

2  
APOLOGIA  
DICTORVM  
ARISTOTELIS  
DE CALIDO INNATO.

Aduersus Galenum .

CAESARIS CREMONINI  
CENTENSIS

IN SCOLA PATAVINA

Phylosophi Primæ Sedis.

A D

Illustris. & Excellentis.

DOMINICVM MOLINVM  
SENATOREM PRVDENTISSIMVM.



VENETIIS, MDCXXVI.

Ex Thypographia Deuchiniana.

APOLLO

DICTOR

ARTIST

DE FINE

THE

THE

THE

THE

THE

THE

THE

THE

THE

THE

THE

THE

THE

THE

THE

THE

THE

THE

THE

THE

THE

THE

THE

ILLVSTRISSIMO<sup>3</sup>

A T Q V E

EXCELLENTISSIMO VIRO  
DOMINICO MOLINO

SENATORI PRVDENTISSIMO.

CAESAR CREMONINVS F. P.



*Quod tuo nomine inscribo volumine  
est exiguum: Apposite ad eum Se-  
natorem, qui Patriam virtutibus  
ornat, & sapientia in ea fouenda est  
totus, iuxta illud Horatij ad Au-  
gustum.*

„ ——— in publica commoda peccem  
„ Si longo sermone morer tua tempora

*Res ipsa non adeò exigua. Agitur hic fundamentū  
artis Medicæ, quæ aut in perniciem, aut in corporum  
salutem. Sermo de calido, quod vocant innatum; hinc  
vita homini, & interitus. Disputatio pro Aristotele  
contra Galenum; ille totius sapientiæ, hic inter Medi-  
cinæ Principes. Ego quidem nihil mihi arrogo, sed pu-  
to eum, qui pro Magistro aliàs Apologiam instituit, nō  
posse sine defectionis crimine in hoc vno deserre.*

*Quamquam non magis ipsius dignitas, quàm veritatis*

A 2 studium

*studium me allicit. Seorsim verò hoc ab alijs perscrutationibus medicis, quale prorsus Domi de ambulando, vt consueui Scholaribus scribentibus, dictabam, in vulgus edo, quòd sic tempus, & occasio expostulat. Esto in primis præscriptum Lucretij illud.*

- ,, Desine quapropter, nouitate exterritus ipsa,
- ,, Expuere ex animo rationem, sed magis acri
- ,, Iuditio perpende, & si tibi vera videtur,
- ,, Dede manus, aut si falsa sit, accingere contra.

*De ipso opere quidquid alijs visurum sit, non multum laboro. Hoc certè non tam meo, quàm præstantium Virorum iuditio facio, quòd tibi illud Illustrissime, & Excellentissime Moline volens libens dò dico. Nam primum res ipsa controuersa cui alteri, quàm tibi erat committèda, qui communi litteratorum calculo de omni scientiarum studio arbitrer datus es? Deinde, cum boni, & docti omnes te colant, & suspiciant, cur ergo vtrorumque studiosus Patronum non queram? imò potius non agnoscam? Memini enim, cum primum Patavium veni, auditorem te habuisse, & meæ Scholæ egregium factorem; generosæ Adolescentem indolis, & ad Heroicum splendorem factæ; ne sit mihi amplius de eius patrociniò dubitandum, quem vltro semper tenuitatis meæ equissimum æstimatorem sum expertus: Tu, inter maximas Reipublicæ curas, quibus urgeris, labores hosce, & obseruantiam nostram æqui boni que consule. Viue diu, & vale.*

# DICTATA<sup>s</sup> CAESARIS CREMONINI

In Scola Patauina Phylosophi Primæ Sedis .  
DE CALIDO INNATO.

DICTATVM PRIMVM.

*Proponitur occasio, vtilitas, & ordo disputationis .  
Elementorum qualitates quomodo se habeant  
in compositione mistorum. Tres dubita-  
tiones circa hoc.*



Aristoteles secundo de Ani-  
ma textu 40. disputabat ad-  
uersus dicentes, ignem esse  
causam augmenti, & in tex-  
tu 41. colligebat, ipsum esse  
concausam, quia calidum  
sit veluti animæ instrumen-  
tum ad ea opera, quæ pro auctione requiruntur.  
Hoc dat nobis occasionem habendi tractatum,  
quem aliàs sumus polliciti de calido innato: il-  
lud enim calidum, quod est animæ instrumentū  
ad opera vitæ est calidum, quod vocant innatū.  
Huius tractatio est maximè difficilis propter  
multa,

multa, quæ à scriptoribus in hac consideratione  
 dicuntur, præsertim, quia multa etiam in illo-  
 rum dictis est confusio; quocirca a nobis magis  
 accuratè res est consideranda. Videbimus autem  
 inuolutiones præsertim recentiorum. Et quan-  
 tum ad Medicos considerabimus solum Gale-  
 num; quantum ad alios considerabimus, quæ  
 dicit Albertus in libro de Animalibus. Est au-  
 tem hæc consideratio, & maximè digna, & ma-  
 ximè utilis; tum secundum se, quia scire per se  
 est bonum; tum etiam, quia ex hac considera-  
 tione aperietur via ad intelligenda plurima, di-  
 gna scitu in Animalibus, & in homine: veluti ea,  
 quæ dicuntur de Iuuentute, Senectute, Vita, &  
 Morte, & alijs talibus. Quòd si etiam contingat,  
 vt hæc consideratio afferat iuuamentum Medi-  
 cinæ, vt nos credimus, tanto magis erit utilis;  
 Quocirca nulla ex parte iste labor potest esse va-  
 nus. Modus autem considerandi mihi iste erit,  
 vt dicam ad veritatem accipiendam, non ad cõ-  
 tentionem, & ad conuincendum aliquem, qui  
 oppositum sentiat. Dabo etiam operam, vt or-  
 dinatè, & dilucidè dicam vitando omnem con-  
 fusionem, quam aliqui videntur affectasse. Si af-  
 feram quod verum est, bonum est, vt dilucidè  
 afferam, vt possim intelligi. Si hoc nõ attingam,  
 oportet clare dicere, vt ab omnibus intelligat,

& possit mea opinio reprehendi. Assumo enim hunc laborem ad doctrinam, tùm vestram, tùm meam. Si rectè dixerò, vos docebimini; sin minus aliqui fortè erunt, qui me docebunt, quòd mihi erit gratissimum. Est enim Philosophicum etiam propria reprobare propter veritatem. Vt autem satisfaciam his, quæ dixi, mihi recurrendum est ad illud Aristotelis dictũ quod ignoratis communibus, nō bene possumus propria speculari, quod non obseruauit (mihi ignoscatur) Galenus: in solo enim homine versatus est, ignorando, qualiter res se habeat simpliciter in natura animantium. Ego igitur pro ingressu ad tractationem, mihi hoc in primis duco faciendum, vt explicem, quomodo se habeant qualitates elemẽtares in compositione omnium mistorum, ad quorum compositionem elementa omnia concurrunt; Elementa sunt Ignis, Aer, Aqua, Terra: qualitates calidum, frigidum, humidum, siccum. Omnia igitur elementa esse in misto, ita vt mistum ex omnibus sit constitutũ, habemus ab Aristotele secundo de Generatione textu 49. & si aliquis hoc negaret, deberet respondere demonstrationi, quam ibi Philosophus adducit, & respondere sensui, quo à misto in illius putredine cernuntur singula elementa separari, quod habetis in quarto Metheorum in principio.

cipio. Modo ista elementa veniunt ad compositionem mixti per mutuam actionem, & passionem, quæ est secundum contrarias qualitates, quibus formantur, & sunt caliditas, frigiditas, humiditas, & siccitas. Ex his qualitatibus duæ sunt actiuæ, quæ habent vim effectiuam, duæ passiuæ. Actiuæ sunt calidum, & frigidum; passiuæ humidum, & siccum. Doctrina est Phylosophi in principio quarti Metheorum, quæ per sensum in operibus istarum qualitatum est manifesta; Et prout requiratur aliqua explicatio, eam habebitis, tum apud Expositores, tum in nostra lectione scripta super illo quarto, præsens enim occasio refugit, ut in istis immoremur. Accipiat itaque, quod in mixti compositione concurrunt calidum, & frigidum efficiendo, humidum, & siccum patiendo. Effectio modò essentialis frigidi est congregatio homogeneorum, & etherogeneorum, ut ibi Philosophus, & sensus demonstrat. Si enim in aqua sint plumæ, paleæ, ligna, ferrum, & alia, frigidum simul in glacie omnia congregat. Efficientia vero calidi consistit in congregatione homogeneorum segregando ad hunc finem etherogenea, sic ignis congregat lignum in vnam flammam, separat autem ferrum, quod sit in illo. Quando a principio Elementa veniunt ad mixtionem sunt e-  
 theo-



therogēnea, quia sunt diuersarum specierum, tunc ergo potissimum inualefcit actio frigidi ad conseruandum illa vnita ad hoc vt possint vicissim agere, & reagere pro misti compositione. Interim etiam calor debet agere ad ipsa reducenda in naturam homogēneam, ad quod faciendū coadiuuat etiam frigidum, & calorem tēperando, & illa (vt dicebam) vnita conseruando. Fit igitur inter elementa pro mitione actio talis, donec sint redacta ad vnionem, quod est reduci ad esse simile, & tunc actio calidi maximè viget, quia sicuti illius essentia est facere similitatem, ita eiusdem essentia est illam factam continere. Tunc autem dicitur esse facta similitas quando quęlibet pars misti est mista, tunc enim vnumquodque elemētum est in vnoquoque, & facta est vnio formarum ipsorum elementorum, ex qua resultat vnus actus essentialis, qui est forma misti, sub qua forma misti calidum se habet ad continendam illam homogēnitatē. Et donec durat calidum in tali vigore, etiam mistum conseruatur, quando calidum amittit suū vigorem, vt in putredine, etiam mistum resoluitur. Quę doctrina est euident ex quarto libro Metheororū. Sic igitur se habet, simpliciter loquendo, constitutio misti ex quatuor elementis, & sic se habet calidum simpliciter in omni com-

positione, quæ sit ex quatuor elementis. Sunt modo dubitationes. Vna est, quæ excitauit Olimpiod. hoc pacto. Omnes quatuor qualitates simul cum quatuor elemētis sunt in misto ad mistum constituendum: efficiens autem non potest remanere pars sui effectus, quia sic efficeret se ipsum. Quomodo igitur potest esse verū, vt inter qualitates elemētales, calidū, & frigidū sint effectiue? Altera dubitatio est. Nos obseruamus alia esse mista à prædominio frigida, alia à prædominio humida, & alia sicca, quod videtur non posse esse, stante doctrinā superius posita; diximus enim calidum in omni misto continere mistionem adiunctam formæ ipsius misti, hæc videtur inducere, quòd omne mistum sit à prædominio calidum, quod si sit verum, quomodo seruetur, quòd aliqua mista sunt à prædominio frigida, aliqua humida, aliqua sicca? Tertio dubitatur propter animata, & præcipue propter animalia. In animalibus enim, & in omnibus animatis sunt partes diuersæ, quæ sunt diuersorum temperamentorum. Sequitur ex doctrina supra posita, quòd in diuersis partibus sint diuersi calores continentes diuersas similaritates. Si autem hoc sit, quomodo isti calores in vnum veniunt; ita vt dicatur mistum animatum esse vnum, & habere vnum calorem ad se ipsum confer-

seruandum nutritione, & alijs requisitis ad operam vitam? De his respondendum, quod faciemus in sequenti.

## DICTATVM SECVNDVM.

*Diluuntur tres propositæ dubitationes. In omnibus compositis ex elementis est calor temperamenti, & hic est calor innatus. Et probatur.*

**P**rima dubitatio sic resoluitur. Quando dicit Philosophus calidū, & frigidū esse effectiua, nō respicit ad mixti productionē, quæ debet fieri, quasi velit dicere, quod sūt causæ effectrices in productione mixti; sed respicit ad duas alias qualitates, humidum, & ficcum, & inquit, quod in comparatione ad illas habent rationem effectiui, quia congregant, continēt, & terminant illas, dū omnes simul mutuò agūt, & patiuntur. Quare nulla est dubitatio. Quod enim dicitur de efficiente, ipsam non remanere partem suū effectus, intelligitur de primo efficiente rei, quæ efficitur, productiuo. Adiungitur etiam, quod quando dicit Aristoteles, omnia elementa esse in mixto, istud est intelligendum, quatenus omnia concurrunt ad mixti generationem, nihilominus propriè loquēdo mi-

Ita tamquam ex materia sunt ex terra, & aqua. Quod quidem dictum, si velit admitti cautè est intelligendum. Etenim reuera omnia quatuor elementa sunt in misto, tamquam materia receptiua actus, qui est forma misti. Cautè igitur (vt dicebam) recipiendum est illud dictum hoc modo, quòd præcipue mista cõstât ex terra, & aqua, quia ista sunt densiora elementa, quæ videntur maximè esse ad soliditatem, & cõsistentiam misti. Sic dicebat Aristoteles secúdo de Generatione-textu 49. Terra enim inest omnibus, quia vnum quodque est maximè, & multum in proprio loco. Cum itaque omnia mista, vel saltem maxima pars sint circa terram, & aquam, maximè, & multum de istis elementis debent participare. Quod etiam aparet ex sensu, quia videmus in omni mistorum constitutione, rem sic se habere. Et ratio suadet, quia si mista debent conseruari ex loco, in quo sunt, debent maximè conformia esse principijs ex eodem loco concurrentibus ad illorum productionem. Sic potèst haberi aliqua rationabilitas illius dicti, alioquin falsum est, nō esse omnia elementa in mistis, quæ uerè sunt mista. Tertium adhuc est obseruandum, quòd qualitates elementares, per quas elementa ueniunt ad misionem, sunt instrumenta externi efficientis, quod est semen in animatis,

& sim-

& simpliciter loquendo Cælum, quatenus postea particulariter sibi subordinat talem aliquam cōstitutionem in partibus Mundi, ubi fiat generatio alicuius misti. Cum igitur calidum, & frigidum, ex quibus componitur mistum agant ad illam compositionem tāquam instrumenta, non est inconueniens eadem remanere, ut materiam, quia in naturalibus causa instrumentalis reducitur ad causam materiale. Ita ut propositio, quę dicit effectiuum non remanere partem effecti, sit semper intelligenda de proprio effectiuo. Vno exemplo rem declarabo. Fit aurum, & argentum in mineris, & fit per mitionem elementorum mutuò agentium per has qualitates, ut diximus calidum, & frigidum. Ibi nō sunt prima effectiua loquēdo de frigido, & calido, ex quibus cōponuntur aurum, & argentum, sed est uirtus minere, q̄ utitur istis prout est Cælo subordinata ad oīa generāda sui generis, & suę cōditionis. Hoc esse uerum patet; quia ubi est minera auri, ibi nō est præcisē argenti, quia uires ad hæc metalla generāda sunt distinctę. Quid sit ista uirtus, & quō sub Cælo ordinata alicubi sit, dicēdum partim in Tractatu de Cœli efficiētia in Mundū sublunare, partim in Tractatu pprio habēdo de Metallis. Recurrere solent ad influentias, de quibus suo tempore dicetur. Altera dubitatio erat,

quo-

quomodo possit esse, vt vnũ mistum sit aut frigidum, aut humidum, aut siccum a prædominio; ex doctrina enim proposita videtur dicendum omne mistum esse a prædominio calidum, postquam calidum est illud, quod continet mistionem. Non est difficilis responsio, si dicta sint benè intellecta. Dicitur calidum continere mistum, & alia ad illud faciendum concurrentia in ratione solum similaritatis, prout sint redacta ad homogeneitatem, quia calidi est congregare homogenea, & hæc est eius natura. Quomodo cumque igitur sit facta hæc homogeneitas, & cū qualicumque prædominio, calidum proportionatum illam continebit. Modo in faciendâ hac similaritate mistorum, quæ debent generari, potest esse dominium molis cuiuscumque elementi, ita vt continentia, quæ tribuitur calido, nihil prohibeat, quin sint mista a prædominio terrea, & sicca; a prædominio aquea, & frigida, siue humida. Non enim sub ratione talis naturæ dicuntur contineri in misto a calido, sed solum sub ea ratione, qua deueniunt ad similaritatem. Tertium dictum de varietate mistorum, in animatis, quæ necessario inducit varietatem temperamenti, & caloris, qui sit calor temperamenti, vnde videbatur non posse esse vnum calorem, & vnum mistum animatum, non est difficile

facile resolvere, quia sicuti partes ille sic diuerse  
 simul proportionantur ad vnum animatum cō-  
 stituendum sub vna tanum forma, quæ est ani-  
 ma, ita illi calores temperamentorum diuerso-  
 rum sunt vnus calor in proportionē ad totum,  
 & in proportionē ad vnā formā, sub qua to-  
 ta illa constitutio essentialiter est ordinata. Pa-  
 tebit autem in hoc tractatu suis locis, cur ita fie-  
 ri oportuerit. Hactenus habemus in omnib. cō-  
 positis ex elementis, esse calorem temperamen-  
 ti, cuius est continere temperamentum, quia in  
 sui esse habet similitudinem, & calidi est congre-  
 gare homogenea. Accipite modo hanc conclu-  
 sionem, quod iste calor prædictus est ille calor,  
 qui dicitur innatus, & sit conclusionis probatio  
 talis. Illud calidum, a quo provenit omnibus  
 esse, & vivere, & quo alterato, alteratur in omni-  
 bus esse, & vivere est calor innatus, quia iste ca-  
 lor, qui hæc præstat, debet à primordio genera-  
 tionis inesse quibuscunque vsque ad illorum  
 destructionem. Sit minor talis. Sed illud cali-  
 dum, à quo omnia talia proveniunt, nihil aliud  
 est, quàm calidum temperamenti. Ergo calidum  
 temperamenti est calidum innatum, ut syllogis-  
 mus breuiter sit iste. Illud, in quo constat esse,  
 & vivere rerum est calidum innatum. Sed ita  
 se habet de calido temperamenti. Ergo est ca-  
 lidum

lidum innatum. Maior propositio etiam a Medicis concedetur. Minor verò demonstrabitur succedendo. Sed vos dicetis. Si res ita se habet, ut dictum fuit, in omnibus mistis etiam inanimatis debet poni calidum innatum; receptum tamen est calidum innatum poni in animatis. Si gillatim hæc omnia patebunt. Nunc istud accipite, quòd calidum innatum est in omnibus mistis, quamvis diuersimodè se habeat ad actiones, & vsus in his, & in illis. Sic Aristoteles quando definiuit putredinem, quæ est corruptio cõmunis omnium mistorum tam animatorum, quàm inanimatorum dixit, putredinem esse corruptionem proprij, & natiui caloris, vnde calor natiuus agnoscitur tamquam quid commune omnibus. Queret aliquis vltèrius. Quid dicimus calorem innatum esse in humido, & dicemus postea vitam esse positam in calido, & humido. Cur sic? Loquendo generaliter (de vita postea dicemus) cur inquam sic? Si calor continet similaritatem misti, in quo sunt omnes qualitates, cur potius dicitur in humido, quàm in sicco? Ratio generalis est hæc, quam accipere potestis ab Aristotele secundo de Generatione textu citato. Debet calor temperamenti continere elementa in misto temperata, hoc præstare debet potissimum sibi coniungendo illà qualitatem,



litate, quę magis facit ad hanc vnionem elementorum; talis autem est humiditas, quia est veluti glutem, quo seruantur coniuncta illa, quę sunt congregata, & est ratio terminationis aliorum, quę de se sunt difficulter terminabilia. Ita dicebat Aristoteles, terra sine humido non posset constare, sed oportet illam humido contineri. Quandocumque enim humidum omnino ex illa auferatur, decidet (inquit Aristoteles) Cum igitur ex duabus qualitatibus passiuis humiditas sit illa, quę facit ad determinationem, & continentiam misti, necessarium est calidum, quod debet continere illam sibi associare. Et hæc est

generalis ratio, cur calidum humido copu-

lemus; specialis postea in viuentibus,

præsertim ob Medicos, qui po-

nunt calidum innatum,

& humidum radi-

cale, & pro-

pter

etiam dictum Phylosophi, quod vita

constitit in calido, & humi-

do, assignabitur suo

tempore.

# 

**A**bito sermone vniuersali, constitui continuare applicationē ad aīata, vt disputatio sit breuior, & magis dilucida. Si enim interponerentur sentētiæ, & dubitationes, redderetur totum difficilius. Applicando igitur, quæ dicta sunt ipsis animatis, hoc primò est considerandum, quam habeat calidum tēperamenti diuersam rationem existēdi in animatis ab ea, quæ existit in mistis. Vniuersalia cōueniunt omnibus particularibus, ita vt illud, quod dictum est de calido cōtinere mistionem, quod facit ratione suæ naturæ, quæ est, vt congreget homogenea, sit etiam retinendum in calido temperamēti animatorum; quia, quod est essentialiter de vniuersali, debet adesse omnibus sub vniuersali contentis. Sed præter hoc habet proprium aliquod, quod conuenit calido tēperamenti in animatis recepto. Calidum quidem in mistis continet

tinet misturam, sed non habet vim agendi in ipsam; ita ut possit intrinsecè operari in suum subiectum. Præterea non habet agere intrinsecè pro conseruatione ipsius misti, sed solum qua ratione continet misturam, debet oppugnare extrinsecus occurrentibus, ut mistum conseruetur. Et donec potest hoc facere tandiu mistum conseruatur, quamdiu ab exteriori alteratur, sic ut corumpatur amittendo illam virtutem tunc mistum destruitur, & si alteratio illa extrinseca sit a calore ambientis excedente symetriad caloris temperamenti, ita ut esse calor temperamenti corumpatur in suo humido, quod diximus illi associatum, tunc fit putredo, quæ est corruptio misti, ut habetur quarto Meteoron in principio. Calidum modo temperamenti in animatis non solum habet ista facere, sed habet usum pro animæ operibus, & potest agere intrinsecè in suum subiectum pro conseruatione, & sui ipsius, & totius animati. Habet autem hoc facere prout est subordinatum animæ, quæ ad varia opera est destinata. Primum quidem opus animæ est nutritio, quia vita consistit in nutritione. Iste calor temperamenti præcipuè debet deservire huic operi, quod facit concoquendo nutrimentum, & disponendo partes nutriendas ad receptionem, veluti illas rarefaciendo, & tandem omnia præstando,

quæ pro nutritione requiruntur. Quoniam itaque sunt variæ partes nutriendæ, quæ requirunt uarium calorem sibi proportionatum, ideo sunt varia temperamenta, & variè conseruanda in animatis, quæ quidem in omnibus conseruantur modo prædicto cum adiunctione eius, quod paulo post dicitur. Nunc decet admirari ingenium Aristotelis, & obseruare soliditatem illius doctrinæ. Ista varia temperamenta resultant ex varia actione, & passione qualitatuum elementarium, quæ cum sint formatrices elementorum, necessario habet transmutationem, quæ est substantialis quocumque modo. Quare sicuti in similaribus ista mutua actio desinit in vnâ formam substantialem, quæ est actus vnus temperamenti similis, & per totum eodẽ modo se habentis, ita hæc actio earundẽ qualitatũ in misto aëato, quod est diuersorum temperamentorũ debet desinere in vnũ actum substantialem, qui sit aptus continere, & in vnum colligere diuersa temperamenta, prout etiam diuersitas ipsarum partium est simul materialiter colligata. Iste actus talis est certè diuersus ab actu mistorum, quæ sunt prorsus similia, & hic est actus, qui dicitur anima. Et sic Aristoteles mirabiliter fecit definitionem; quia tota contemplatio concordat sensatis. Derident ipsam, & dicunt. Dixit, quod est actus;

quid

quid significat iste actus? & alia talia digna facultate dicentium. Si fuissent versati in natura, hoc vidissent, quod vidit Aristoteles, & est à nobis prædictum, & cognouissent, nihil esse quod potuerit explicare essentiam animæ, quàm dicere, quòd est actus corporis instrumentarij. Per hoc enim constituuntur animata in proprio gradu, supra inanimata, & declaratur essentia illius actus, quo informantur. Quoniam postea uidit Aristoteles, quòd etià operationes animæ, vt videre, & audire sunt actus, & sunt actus corporis instrumentarij; videre enim est actus visuæ & uidere est actus oculi, qui est corpus instrumentarium, ideo rem omnem optimè intelligens adiunxit, quòd anima est actus primus, idest actus essentialis constituens esse organicum ad differentiam uisionis, quæ est actus superueniens ipsi organo, quæ omnia organa per calidum prædictum viuificantur ad vsum operationum, ad quas sunt facta; modo, & ratione inferius dicendis. Habemus hæcenus diuersitatem, quam habet calidum temperamenti natium in mistis similaribus, & in instrumentarijs. Ne aliquid prætermittamus, quod possit facere ad doctrinam, & ad cõplementum considerationis, oportet etiam videre de differentia humidi, quod diximus sibi ad sociare hoc calidum innatum, & opor-

oportet explicare, quomodo particulariter vitæ dicatur posita in calido, & in humido; cum tamen calidum, & humidum sint etiam in alijs mistis, quæ vitam non habent. Ad memoriam reuocate dictum superius, quod humidum associatur calido pro continentia, quam debet facere calidum; humidum enim est veluti glutem, quo ligantur partes. Quare calidum per humidum melius, & facilius potest facere continentiam, hoc solum est in mistis, quia vt dictum fuit, nihil aliud debet facere calidum in mistis, quàm continere. In animatis modo habet aliud opus, vt vidistis. Istud autem opus, vniuersaliter loquendo, est agere ad vitam animati; agitur autem ad hoc primo per nutritionem; abolita enim nutritione, actum est de vita animati. Quare calidum ad aliud usum sibi in animatis humidum adiungit; debet enim fieri conseruatio animati per nutritionem. Nutritio fit per concoctionem alimenti. Et concoctio alimentæ, quæ facit ad nutritionem, est præcipuè elixatio, quæ elixatio fit per calidum, & humidum. Et primæ partes, quæ sunt nutriendæ in animali, (talis autem est caro) habent hoc temperamentum, ut calidæ sint & humidæ. In alijs ficioribus fit concoctio per calidum, & humidum, licet minus humidum, quod etiam humidum facit ad faciliorem receptionem, & ad meliorem

liorem distributionem. Associat igitur sibi calidum humidum, quod vocant radicale propter huiusmodi vsum, præter continentiam communem etiam mistis inanimatis. Vita verò dicitur rectè posita in calido, & humido, quod & sensu videmus, quia senes ad mortem tendentes frigidi sunt, & sicci. De re igitur nullum est dubium. Ratio vero, cur dicatur vita esse in calido, & humido, si etiam in his, quæ non habent vitæ, est tamen calidum, & humidum, satis habetur ex superioribus, quia ad calidum, & humidum, in quo consistit vita, requiruntur illæ operationes, quæ superius sunt dictæ, quas non potest habere calidum in corpore simili; requiritur enim diuersitas partium propter diuersitatem actionis, quæ requiritur ad complementum talium operationum. Exemplo: Debet cibus cōverti in carnem, requiritur multiplex actio, quæ varias partes diuersorum temperamentorū requirit. Venter facit vnam coctionem Hepar vltiorem, Cor exactam, inde autem ad partes distribuitur nutrimentum, quod debet partibus assimilari per actionem proprii caloris. Tertium vnum est considerandum, quod calor temperamenti in animatis est varius in varijs partibus variè temperatis, cum tamen animatum sit vnū, oportet huic calori attribuere aliquam vnitatē,

& ideo oportuit in perfectis animalibus adesse cor, quod sua actione sanguinem, & spiritum faciat, quos transmittat ad partes ratione vsus, qui dicendus erit.

### DICTATVM QVARTVM.

*Datur vnum calidum commune, quod est fons, & principium totius caliditatis. Et hoc est positum in corde in perfectis Animalibus.*

**V**ariæ partes, quæ fuere requisitæ ad Animal constituendum etiam materialiter, quatenus scilicet corporeæ sunt, simul connectuntur, quod requirit animalis vnitas, habent postea etiam pleniorē coniunctionem sub forma, quæ est anima, cuius quidem animæ cum præcipuum instrumentum sit calor, oportuit etiam vniri calores varios variorum temperamentorum in varijs partibus, ratione vnus communis caloris, qui esset tamquam fons caliditatis in respectu ad alios calores; ideo natura constituit cor tamquam præcipuum membrum, & caloris fontem, & prouidit, vt ab ipso deriuaretur calor per totum diffundendus, quod fit per spiritus, & sanguinem, qui à corde ad omnes partes transmittuntur. Iste autem calor sic  
per



per spiritus, & sanguinem transmittendus est generatus ex ciborum transmutatione a calido temperamenti eiusdem cordis. Vnde sicuti temperamentum illud, cum sit temperamentum principij, habet ueluti communem proportionem ad omnia temperamēta quatenus sunt vitalia, ita calor iste sic generatus ab hoc primo temperamento habet proportionem ad omnia temperamenta calorum in omnibus partibus, prout etiam illi sunt calores de seruiētes ad opera vitæ. Iste vero calor sic participatus habet vim excitandi, viuificandi, & fouendi omnes partium calores ea ratione, qua omne principium habet facultatem ad omnia principiata conseruanda, & perficienda. Quare hic non est diuersus calor; nam similiter est productus à calore temperamenti ipsius principij, qui quidem calor, vt dixi, fuit necessarius ad illud perficiendum, quod proposuimus. Quoniam verò sunt varia temperamenta, & ideo debuit ipse variè applicari pro illorum fomentis, ideo facta sunt à natura aliqua instrumenta ipsi cordi ad id præstandum, veluti factum est cerebrum ad refrigerationem pro sensione. Omnino autem principium est virtute totū, & principium est huiusmodi naturæ, vt quadret, & conueniat omnibus principiatis secundum conuenientiam in illis

lis requisitam. Vnde iste calor est sic ad vitam temperatus, ut facile accomoderetur cuicunque temperamento ad vitam facto. Vnde recipitur in partes secundum modum, & rationem recipienti illis convenientem. Hæc enim est propria illius natura, ut taliter se habeat. Et præterea tri-  
tum est illud, quod omne, quod recipitur, recipitur per modum recipientis. Vnde varijs partibus recipientibus iste calor variè aptatur, prout ille partes requirunt. Hunc vocant Medici calorem influentem. Nos non curamus de vocabulo, & de appellatione, modo res intelligatur, quæ fortè non est aliter intelligenda, quam modo prædicto. Dicit aliquis. Ista temperamenta varia, & ista opera caloris, & animæ, diuersa sunt etiam in plantis, & in infectis, & omnino in animatis, quæ cor non habent. Quomodo igitur se se habet in illis, id quod attinet ad varias operationes, & ad unionem multorum calorum diuersorum temperamentorum, si ibi non est cor, quod statuimus esse talium principium? Hic oportet accipere doctrinam, quam habet Aristoteles in libro de Respiratione, quæ est doctrina certissima, cum sit conformis sensatis. Inquit Aristoteles. Respiratio est ad refrigerandum principium, quia calor requirit talē refrigerationē. Vnde ubicumque habeatur refrigeratio, quæ præsertim est necessaria

ria ob nutritiuam, non erit necessaria vlla respiratio, modo per aliam viam refrigeratio possit haberi, quia respiratio non est necessaria, vt respiratio, est necessaria, vt refrigerans. Si ergo alia via habeatur refrigerium, frustra erit respiratio. Habetur autem ex continente, & ex ipso nutrimento. Satis Plantæ refrigerantur nutrimento, quod assumunt ex aqua, & terra; satis etiam ex ambiente. Pisces non respirant; satis etiam, & ipsi ex hoc habent refrigeriū, dum viuunt in aqua. Similiter insecta, & aere, & nutrimento sufficienter habent refrigerium. Sic igitur in nostro hoc proposito fuit necessariū cor in animalibus perfectis, & cor faciens operationē, quam diximus, quia animalia perfecta sunt multum dissimilaria, & organizata, & habent multam varietatē partium, & temperamentorum. Plantæ, & Animalia prædicta sunt parum dissimilaria, & ferè per totum eiusdem temperamenti, licet cum aliqua varietate. Vnde pro præstando eo, quod præstat cor in perfectis, sufficit cōtinuatio ipsorum cum ea parte, quæ est in illis proportionalis cordi, est autē illa in Plantis, à qua mittuntur radices ad trahendum alimentum. Et tanto magis hoc sufficit, quia illa pars proportionalis cordi est vt plurimū veluti adgenerata omnibus partibus, vel pluribus, & per totum diffusa. Sic vi-

demus furculos Plantæ acceptos, & terræ impositos mittere radices, & nouam Plantam germi-  
nare, quod non esset, nisi etiam per ramos esset  
diffusa quomodocumque pars illa principalis,  
quæ dicitur subire proportionē cordis. Idem ui-  
demus in animalibus infectis, quæ si diuidantur,  
partes tamen aliquandiu sentiunt, & mouentur;  
non possunt autem uiuere, ut Plantæ, & partes  
Plantarum propter defectum instrumentorum.  
Sic igitur benè dictum est, quod de corde in per-  
fectis animalibus est dictum. Adeò uerò neces-  
sarium est, calidum à principio profluens, ut si-  
ne illo alia calida in temperamentis partium  
non possint obire sua opera, & hoc est naturale,  
& sensatum, quia à principio omnia depen-  
dent, & sine principio nullum principiatum, aut  
operabitur, aut etiam erit. Sic cessante motu Cœ-  
li, quod quidē Cœlum per motum habet ratio-  
nem effectiui ad omnia sublunaria, nullus erit  
motus, nulla effectio, nullum bonum in sublu-  
naribus. Sicut dicebat Plato. Si Deus, qui est om-  
nium principium se se abdicet à Mundo, Mun-  
dus non erit, sed in chaos reuertetur, & in illud  
ens inordinatū, ex quo idem Philosophus dicit,  
illum à Deo fuisse factum. Est hoc calidum in hū-  
mido fundatum, ut supra etiam diximus sim-  
pliciter de calido omnium temperamentorum.

Istud

Istud autem humidum debet esse sic temperatū,  
nē sit congelabile, aut facile exsiccabile. Qua-  
re debet habere medietatem quandam inter ae-  
reum, & aqueum; humidum enim aqueum faci-  
le congelatur, ita vt videamus Plantas, in qui-  
bus fortē sit plurimum humidi aquei in hieme  
per ingentia frigora, congelari, vt propemo-  
dum faciunt flumina, & disrumpi, & mori.  
Sed de hoc erit postea sermo, quando tractan-  
dum erit de Iuuentute, Senectute, Vita, &  
Morte.

### 

*Calidum innatum esse calidum temperamenti, ipsumq;  
calidum elementi iterum probatur. Redditur  
ratio, quomodo stante hac sententia fiant  
morbi, & febres.*

**C**onfirmatio, quod calor innatus debeat  
esse calor temperamenti, & calor elemē-  
taris adhuc potest haberi ex istis. Primò  
nō est dubium, quin omne minimum in corpore  
animato debeat participare calidum innatum;  
ita vt calidum innatum debeat esse ubicūq;. Et  
ratio est, quia quodlibet minimum in corpo-  
re

re animato viuit, & nutritur, nihil autem potest  
 viuere, & nutrirī sine hoc calido. Ratio itaque sic  
 formabitur, calidum innatum debet esse vbiq̃ue  
 per totum corpus animatum, sicut nullum mi-  
 nimum eo destituatur. Sed solum calidum tem-  
 peramenti potest esse huiusmodi. Quare calidū  
 temperamenti erit calidum innatum, & nihil al-  
 liud poterit hoc esse, nisi calidum, quod est ex  
 temperamento Minor propositio est clara, quia  
 ad temperamentum, & mistionem concurrunt  
 quatuor elementa, quæ per totum mistum secū-  
 dum omne signum sensibile vniuntur sub for-  
 ma, quæ calido vtitur ad continendam mistio-  
 nem in alijs; in animatis vero etiam ad alia ope-  
 ra. Quòd etiam istud calidum debeat esse cali-  
 dum elementare, satis est compertum, quia ha-  
 bet operationes calidi elementaris; etenim ha-  
 bet segregare etherogenea, & congregare ho-  
 mogenea pro facienda nutritione, quæ sunt ope-  
 rationes calidi elementaris. Adiungite vltterius,  
 quòd istud calidum innatum debet habere con-  
 trarium; etenim quicquid fit per ipsum in cor-  
 poribus animatis fit per materialem, & natura-  
 lem actionem, & passionem. Modo actio talis,  
 & passio requirunt contrarietatem, quia vnum  
 debet transmutari in aliud, vt cibus in carnem,  
 quod non potest fieri, nisi per transmutationem

materiae de vna in aliam formam, Hoc autem nō  
 potest esse nisi ratione contrarietatis. Omnino  
 si consideremus omnia opera, quæ proueniūt in  
 corporibus animatis à calido innato, non pos-  
 sunt esse opera, nisi caloris elementaris. Habea-  
 mus vnum exemplum. Sit Apostema Calor de-  
 bet agere ad illud euincendum (non adiunga-  
 mus nunc medicamētā) Calor si fuerit fortis per  
 se illud superabit; debet autem superare uon ali-  
 ter, quàm materiam concoquendo, vt possit il-  
 lam expellere, vt postquam concoxerit, idem ca-  
 lor per se ipsum disrumpet Apostema, & mate-  
 riam foras mittet. Si quispiam est, qui possit di-  
 cere, hæc non esse opera caloris elementaris, &  
 caloris contrarium habentis, poterit etiā di-  
 cere alia dissona cōtra sensū, & ad libitū. Cū igi-  
 tur operationes appareāt euidenter caloris elemē-  
 taris, qui postea non est calor, nisi téperamenti,  
 necessarium est dicere calorē innatum, quo ani-  
 ma utitur ad conseruationem animati esse calo-  
 rem temperamenti. Hic libet duo considerare,  
 quæ similiter hanc rem declarabunt. Vnum est,  
 quomodo stante hac sententia, quam nos poni-  
 mus, fiant morbi, & febres præcipuè. Alterum  
 est, quod dicunt de actuandis medicamentis a  
 calore propter expulsionem humorum febrem  
 facientium. De utroque breuibus. Quantum  
 ad

ad primum . Notum est, istum calorem temperamenti esse positum in mediocritate, & in temperie. Contingere igitur aliquando est necessarium, ut ab aliquibus quibuscunque ualdè alteretur, & opprimatur. In omne, quod illi obijcitur, agit uel ad usum pro nutrimento, uel ad expulsionem ratione nocuenti. Cum igitur illi obijcitur aliquid, quod non faciat ad usum nutrimenti, quinimò deturbet illum calorem natium à sua mediocritate, tunc insurgit ad agendum contra illud pro illius expulsionem. Dum autem non potest ipsum concoquere; ita ut illi domineatur, & ipsum expellat, actio semper magis inualefcit, & dum recipitur calefactio in illam materiam ledentem fit uigrosior caliditas. Et si sumus in termino caliditatis, qui requiritur ad febrem, fit febris. Vnde et à Medicis rectè dictum est, quòd febris est conuersio nativæ caliditatis ad igneam, quæ quidem conuersio fit, & intelligitur modo prædicto, quatenus scilicet calor natus agit in obfistens, nec potest illud vincere, reflectit enim quodammodo suam actionem in seipsum, & sic remouetur à moderatione, quæ sibi naturaliter est conueniens, & fiunt febres. Ita videmus etiam multiplicari calorem factum à Sole cum occurrit alicui reflectenti. Actio enim, quæ deberet ulterius progredi, reuertitur versus suum



principium, & multiplicatur, & inualefcit. Ita docebat Aristoteles in primo Metheorũ, & habere potestis in lectura scripta illius libri, vbi agitur de calore factò à sole. Pro varietate postea materiæ, in quam agit calor ad expellendũ, sient acrimoniæ, & variæ affectiones caloris, qui dicitur Febrilis per totum corpus. Et si vos aduertitis, quod supra diximus de communicantia calorum temperamenti particularis cum communicatore, qui est in principio quod est cor, facile cognoscetis, quomodo etiam, quando putrescit aliquis humor in aliqua parte separata, vt in ventriculo, vel hepate, uel secundum aliquem morbum particularem, ut in aliquo Apostemate, communicetur tamen noxa cordi, ex cuius affectione fit febris. Hoc sane principio respondebitis, de omnibus contingentibus circa quoscumque morbos, in quibus est affectio caloris: Nunc sit satis dixisse, quia res, quam agimus vltterius non requirit. Alterum dictum sic dilucidatur. Natura fecit in partibus fibras ad attrahendum, retinendum pro concoctione, & ad expellendum. Quare concoctio, quæ nihil aliud est pro nunc, quàm dominium caloris naturalis supra materiam, quæ est concoquenda, quare inquam, ista concoctio, uel est ad retinendum, uel est ad expellendum, calor enim numquam ex-

E

pellet

pellet aliquid morbosum, nisi illi dominetur;  
 unde est præceptum, concocta medicari. Quādo  
 igitur accipiuntur medicamenta, naturalis ca-  
 lor debet agere ad ipsa concoquenda, quia de-  
 bet acquirere dominium supra illa, vt possit illis  
 vti prout sunt idonea ad nutritionem, si possunt  
 nutrire, ad expulsionem si non sunt nutritiua.  
 Agitur igitur in ipsa, & concoquit alterando pro  
 acquisitione huius dominij, quando illa iam al-  
 terauit, sic, ut aquisierit illud dominium, forte  
 illa resoluendo in vapores, aut quomodocum-  
 que aliter ea alterando ad acquisitionem prædi-  
 cti dominij. Tunc postquam illa nō sunt nutri-  
 tiua, debent expelli, quod statim aggreditur ca-  
 lor, vnde rationabiliter sequitur, vt in hac expul-  
 sione medicamentorum ea simul expellantur,  
 quæ cum illis habent proportionem. Natura e-  
 nim valida vndique excitatur, & simul cum  
 expulsionem medicamenti, quod iam factum  
 est excrementum, expellit illos humores, qui  
 habebant proportionem cum medicamento  
 & sint præparati ad expulsionem. Vnde rectè  
 dicitur, quod si purgentur qualia purgari oportet,  
 confert, & facile ferunt; purgantur autem,  
 quando calor dominatur, & potest naturaliter  
 operari ad custodiam sui ipsius, & expulsio-  
 nem lædentium, quæ quidem lædentia sint ita  
 dispo-

disposita, vt non amplius reluctentur. Si contingat, vt sint malè disposita, malè propinauerit Medicus medicamentum, & fiet euacuatio cum dolore, & læsione. Præsertim autem aduertendū est, vt calor dominium acquisuerit; sic fit purgatio per medicamenta, & hoc est, quod dicitur de actuandis medicamentis, idest reddendis aptis ad illud præstandum, propter quod fuere exhibita, quod fit à calore concoquente modo prædicto. Ista omnia, ni fallor, significant hūc calorem debere esse per totum, & hunc calorem debere esse elementarem. Quibus dictis, potest adiungi, quod calor iste repatitur agendo, alteratur, diminuitur, extinguitur quantum ad illud, quod habet in officio vitali; remanet enim etiam in cadaueribus quantum ad officium, quod habet in continentia misti. Quæ omnia, si vultis bene intelligere. recurrendum est ad antedicta: videbitis enim omnia consona, & nos strictim dicimus, quia non decet in talibus tractatibus occupari in multa, & inani scriptione. Stantibus autem dictis poterit aliquis dicere, si calidum innatum est calidum temperamenti, & humidum illi proportionatum est humidum temperamenti, iam omnis complexio viuentis erit calida, & humida, quod est contra omnem rationem, & videtur contra sensum. Responsio debet esse

huiusmodi: si vita consistit in calido, & humido non est dubium, omne viuens esse complexionis calidæ & humidæ. Quòd autem in hoc consistat præter dicta Aristotelis, & omnium, est etiam sensus; quia senectus, quæ est diminutio vitæ tendit ad frigidum, & siccum, & mors non est nisi frida, & sicca. Quòd autè dicitur de multiplicitate complexionum est verissimum, sed illud intelligitur supposita vita, & comparatiuè; nulla complexio est frigida, & sicca, nisi comparatiuè prout minus habet de calido, & humido; nihilominus si calidum, & humidum vitale absit, actû est de vita. Recurratis ad illud, quod in principio diximus, quomodo stâte dominio calidi in omni misto sint tamen aliqua à prædominio frigida, sicca, humida; hoc enim nihil repugnat, quia in mistis dominatur calidum, & humidum solû ad continentiam, non quantum ad molem, & quantitatem, vt etiam in animatis calidum, & humidum habent dominium vitale in reliquis ratione maioris, vel minoris participationis alicuius elementorum frigidorû. Potest esse complexio cuiuslibet alterius conditionis.

*DICTATVM SEXTVM.*

*Proponitur opinio eorum qui dicunt calorem natium  
esse spiritum, & in spiritu reponi.*

**Q**Vamuis ea, quæ dicta sunt, sensatis maxime sint consentanea, in quo dicebat Averroes, & Aristoteles consistit experimentum sermonum verorum; tamen sunt ad hoc propositum opiniones mirabiles, de quibus brevissimè dicendum. Relinquemus autem modernis sua dicta, versabimur, vt diximus in Alberto, & in Galenò. Albertus libro 20. de Animalibus, cum considerasset vsque ad quintum caput elementorum constitutionem in corporibus animalium, aggreditur in quinto capite considerationem opinionis nonnullorum, qui voluerunt cœli substantiam etiam reperiri in corporibus animalium, quam quidem opinionem proponit in illo capite cum omnibus fundamentis loquentium in illa. Sexto capite illam reprobat, septimo respondet argumentis. Habebitis igitur apud ipsum plenissimam doctrinam, quæ non est necessarium transcribere. Accipiam ego omnia brevibus, & studebo, vt nihil remaneat dubium

dubium . Fuit igitur vna opinio, quæ forte fuit illorum, qui chymicæ incumbunt, quia hoc, quod dicitur Cælum esse in corporibus animalium, ampliauerunt etiam ad mista aliqui vt per sublimationem abstraherēt quintam essentiam ad decipiendos sciolos, & ignaros . Ponunt igitur isti, quicumque fuerint, Cœli substantiam reperiri in corporibus animalium . Habent hoc fundamentum . Corpora Animalium, habent in se quatuor elementorum qualitates; istæ sunt inuicem contrariæ: contraria simul posita necessario agunt, & patiuntur inuicem, quod debent facere calidum, & frigidum, humidum, & siccum in mistura . Quare necessarium est, misturam dissolui, nisi sit aliquid continens . Istud continens non potest esse de natura elementorū, quia omnia inuicem sunt eiusdem conditionis . Ergo debet esse de natura superiori, quæ est Cælum, cuius est continere, & gubernare totum mundum sublunarem . Argumentum itaque erit istud . Requiritur continens contraria in vnione . Hoc non potest esse aliud, quàm substantia cœlestis, vel aliquid de substantia cœlesti . Ergo oportet in corporibus animalium esse aliquid de substantia cœlesti ad præstandum hoc officium . Simile argumentum habet Aristoteles contra Empedoclem, qui dicebat animam esse ex

se ex elementis iuxta positis . Dixit Aristoteles,  
 Elementa separabuntur, nisi sit aliquid, quod il-  
 la retineat congregata; hoc autem erit supra illa,  
 & ideo erit anima, quæ hac ratione debet esse  
 aliquid supra elementa . Accepta sic conclusio-  
 ne sequuntur postea ad inueniendum, quid sit hoc  
 cœleste substantiale, quod est in corporibus ani-  
 malium; & inquirunt, hoc esse lucem, quam pro-  
 bant esse supra substantiam elementorum; etc-  
 nim solum cœlum lucet, nullum autem elemen-  
 torum, neque etiam ignis in propria sphaera. Di-  
 cunt igitur, lucem esse illud cœleste, quod est in  
 corporibus Animalium . Hic illi ipsi postea sunt  
 diuersi. Quidam dicunt, lucem esse corpus; quidã  
 solummodo esse quid corporeum. Loquemur cum  
 istis postremis . Dicunt, lucem esse formam, &  
 omnem formam recipi in aliquod subiectum .  
 Quare in corporibus Animalium esse spiritum,  
 in quem lux recipiatur ad illud formandum, ita  
 ut constituat spiritum esse de natura lucis, quod  
 postea multipliciter probant . Albertus prolixè  
 proponit omnes vias, quæ sunt vsque ad decem .  
 Nos accipiemus breuiter illa, in quibus consistit  
 rei declaratio . Probant igitur spiritum esse de  
 natura lucis, quia spiritus in corporibus anima-  
 lium se dilatat ad omnem diametrum, ut etiam  
 facit lux in vniuerso; pertingit enim spiritus per  
 totum

torum corpus secundum omnem corporis dimensionem, hoc autem non potest esse elementare, quia motus elementorum sunt determinati ad unam tantum loci differentiam. Adiungunt, quod mouetur spiritus in modum pyramidis, ut etiam facit lux, quæ à Sole procedens, & habens in eo veluti conum pyramidis sese extendit per totum secundum basim; ita spiritus per diastolè expanditur à corde ad omnia, per sistolem sese restringit ad cor, tamquam ad centrum, quod significat spiritum habere à corde exitum pyramidalem. Quapropter etiam cor figuram pyramidalem fuit sortitum. Adiungunt, spiritum in corde subito moueri, quod non est alicuius elementorum, sed luci conuenit, quæ est de celesti substantia; hinc est (dicunt) quod dicimus spiritus lucidos, tamquam a luce naturam habentes. Accedit, quod qualitates elementorum non mouent nisi ad formas aut elementorum, aut mistorum ex elementis; spiritus autem lucidus mouet ad formam viuientis, quæ quidem vita est, quid supra elementa, & mista, quare non potest esse de natura elementorum. Adiungunt qualitates elementorum esse unius tantum effectus simplicis; spiritum verò esse ad plurimos effectus ad nutriendum, ad expellendum, ad sentiendum, & ad omnes alios effectus, in quibus  
 consi-



consistit esse vitale. Cum itaque hoc totum sit  
 supraelementa, necessarium est etiam, spiritum  
 esse ratione suæ formæ aliquid supraelementa.  
 Quod supraelementa, est Cælum. Ergo oportet,  
 spiritum esse de substantia cælesti, quod erit ra-  
 tione lucis. Considerant etiam modum actio-  
 nis, & inquirunt, actiones elementorum non pro-  
 dire absque cōtrarietate, quinimò non esse prop-  
 ter aliud, quàm propter contrarietatem. Dicunt,  
 autem spiritum facere omnia, quæ facit absque,  
 contrario; viuificat enim visuam in oculo, audi-  
 tiuam in aure absque vlla contrarietate. Subiun-  
 gunt, spiritum esse illum, qui membris inuehit  
 virtutes, tunc dicunt, Illud, quod inuehit alicui,  
 debet esse aliquid diuersum ab illo secundum  
 substantiam, & naturam. Spiritus inuehit virtu-  
 tem membris. Ergo debet esse aliquid substan-  
 tia distinctum, à substantia membrorum. Sub-  
 stantia membrorum est substantia elementorū,  
 quia sunt ex elementis; quare debet esse aliquid  
 supraelementa. Quod est supraelementa est  
 substantia cælestis. Ergo spiritus est de sub-  
 stantia cælesti: Qui quidem spiritus videtur om-  
 nino debere esse talis ex ea cōditione, quā habet  
 in se ipso, quæ quidem conditio est propria lu-  
 cis; sicut enim lux contrahitur ad lucidum ibi se  
 vniendo, ita etiam spiritus contrahitur ad vnum

in acumine cordis. Augetur etiam spiritus diminuto corpore, & aucto minuitur, quod non conuenit naturis elementorum. Præterea elementum, & elementatum, quod est mistum, sunt vnus tantum esse, & vnus tantum formæ; spiritus est multiplicis esse, & multiplicis formæ vnus, & idem existens; est enim spiritus in corpore naturalis, vitalis, Animalis, quæ omnia requirunt naturam supra naturas elementorum. Quocirca euidenter est, Cælum reperiri quantum ad suam substantiam in corporibus animalium. Veniunt vsque ad hoc, vt dicant in morte hoc videri; & Populi testimonio vtuntur; dicimus enim morientem trahere spiritum, & de facto videmus morientes ita anhelantes, & videmus exitum spiritus in vltimo termino, tamquam in incorruptibilis existens aufugiat corruptibilitatem. Vnde si petatis ab istis de calido innato, debent dicere, vel esse hunc spiritum, vel consistere in hoc spiritu: iste enim spiritus est, quia omnia facit in corporibus animatis, quod quidē diximus esse opus calidi innati. Ita breuiter accepimus, quæ prolixius Albertus: breuiter etiam accipiemus reprobationem & rationum resolutionem.

*DICTIONVM SEPTIMVM.*

*Reprobatur opinio allata ex Alberto, & ex propria  
sententia, & excluditur substantia cœlestis  
à mistionibus elementorum.*

**A**lbertus, vt dicebamus, reprobatur opinio-  
nem, postea responderet argumentis. Nos  
breuissimè colligemus, quæ sunt oppor-  
tuna; alia in ipso videbitis. Reprobatio in hoc  
debet consistere, quòd non declarant modum, se-  
cundum quem substantia cœlestis veniat in cor-  
pora Animalium, nec declarant, quomodo sit  
possibile, ipsam vñiri in mistura elementorum  
absque actione, & passione. Dicebat igitur Al-  
bertus, istud quòd à Cœlo de illius substantia ve-  
nit, vel reperitur in corporibus Animalium, vel  
generatur in elementis, dum scilicet comiscen-  
tur, vel si est lux, aut aliquid tale penetrat corpo-  
ra Animalium, non tamen à Cœlo separatur, vel  
est aliquid ipsius Cœli, quod separatur à Cœlo, &  
descendit in corpora Animalium. Si primum  
dicatur, oportet istud esse generabile, & conse-  
quenter corruptibile, quare substantia Cœli erit  
generabilis, & corruptibilis. Si secundum, ita vt  
dicamus exempli gratia lucem penetrare cor-

F z pora

pora Animalium, non tamen a Cælo separari, sequeretur omnia corpora Animalium esse Cælo continuata, quod est valdè ridiculum. Imò subiungebat Albertus, lux est visibilis, quare hæc cōtinuatio erit visibilis. Si velint tertium. Quod separatur à Cælo, & est de illius substantia, & dicitur esse lux, vel est res corporea (vt volunt aliqui dicentes lucem esse corpus) quoniam modo poterit talis substantia recipi, in corpus animalis, ita vt per totum habeatur? necessarium quippe erit corpus penetrare corpus. Quòd si nō per totum habetur, & in hoc consistit calidum innatum, iam non erit vbique calidum innatum, vt debet esse. Præterea valdè nouum est, hanc vnionem istius substantiæ corpore sic à Cælo procedentis fieri sine actione, & passione, præsertim cum debeat fieri in comissione elementorum, quæ eatenus vniuntur, quatenus simul agunt, & patiuntur. Quæri etiam posset, quomodo mouetur à Cælo ad Animalia Si à seipsa, erit animata. Si ab alio, assignetur mouēs. Si violentia, assignetur imperans violentiam, & erit inconueniens violentia moueri ad constitutionē Animalis, id, quod est in illo præcipuum. Si natura mouetur Cælū, habebit duos motus naturales simplices, circularē, & rectū deorsum. Si lux, quæ sit qualitas incorporea huc descēdit, quæritur,

tur, quomodo possit moueri per se id, quod non est corpus; si enim illuminat vsque ad nos, non illuminat, quia lux separetur à Cēlo, & huc veniat, sed illuminat alterādo perspicuū, facultatē scilicet in aere, & aqua idoneā alterari ad esse lucidū. Omnino autem, si aliquid substantiæ cēlestis descendit ad cōstitutionē corporū in animalibus, certū est Cēlū iā debere esse valde diminutū, semper aliquo ab eo recedēte de substantia illius. Si dicerēt, illud reuerti, inciderēt in somnia, quæ dicit Albertus, nec habent sensum, nec habent rationē, quæ de illis possint attestari. Hoc satis sit. Reliqua in Alberto. Lucem autem non esse corpus, nec lumē defluxū corporis, habebitis ab Aristotele in secūdo de Anima, & ibi præclarā disputationē Ioannis Grāmatici, quemadmodū ad idē ēt habebitis Alex. in lib. de Sensu, & sensibili. Respōdendū modo est ad rationes, in quibus ad vitandā prolixitatē per capita procedemus. Sūt igitur rationes, quæ spiritum contendūt esse de natura lucis, & sunt acceptæ ex motu. Sed antequam has resoluamus, dicendum est aliquid de ratione, qua probant quintam substantiam debere esse in corporibus Animalium. Et ratio est, quia elementa debent contineri, nec possunt contineri præterquàm à substantia superiori, quæ sit Cēlum. Iam diximus hanc continentiam esse

neces-

necessariam, & declarauimus illam demonstra-  
 tione sensata. Continens quippe est forma, & in  
 animatis anima; continet autem interuentu ca-  
 loris, cuius est congregare homogenea, vt supe-  
 rius est dictum. Vnum nunc adiungite, quod  
 tantum abest continens debere esse quid supe-  
 rius, ita vt sit alterius generis, quod quinimò ta-  
 le nullo modo potest continere. Quod enim con-  
 tinet illa, quę sunt vnum per transmutationem,  
 debet esse terminus transmutationis. At termi-  
 nus transmutationis est in eodem genere. Ergo  
 quod talia continet, debet esse eiusdem generis.  
 Cum itaque substantia celestis sit alterius gene-  
 ris, penitus illi repugnat talis continentia, quę  
 si fieret ab aliquo genere diuerso, illud mistum  
 non esset vnum, nisi ab extrinseco, & ita vnum,  
 vt fascis lignorum ligatus, vt docet Aristoteles  
 quinto Methaph capite de vno. Si istud conti-  
 nens est vnum tamquam terminus transmutatio-  
 nis, tunc verè, & propriè mistum contentum ser-  
 uat vnitatem. Hoc accipite, si factis omnibus  
 membris corporis humani seruaretur continen-  
 tia ad vnam intelligentiam, impossibile esset il-  
 lam continere, quia est actus separatus, qui de se  
 non habet proportionem ad talem materiam,  
 qualis est commistio elementorum ad faciendā  
 temperamenta corporis animati. Ideo Auer-

roes ponens intelligentiam in homine ponit ip-  
 sum hominem habere prius esse vnum, & esse  
 hominem ab anima, quæ sit prædita facultate  
 cogitativa, quæ est proprius actus resultans na-  
 turaliter ex illis temperamentis. Quæ modo di-  
 cuntur de motu ad ostendendū, quod spiritus sit  
 de naturalibus, pingui quadam minerua dicun-  
 tur, & sunt similia nugis, quàm doctrinæ. Nā  
 aliud est considerare spiritum, prout est talis na-  
 tura corporea, in qua dominetur siue aer, siue  
 ignis, quod est considerare ipsum purè naturali-  
 ter; aliud est considerare spiritum instrumenta-  
 riè, prout est instrumentum animæ ad viuifican-  
 dum, & operandum. Quando accipitur hoc mo-  
 do, vt debet accipi in corporibus Animalium,  
 debet habere motum qualem cūque ei præbeat  
 anima, quæ illo vitur ad varia opera. Quare qđ  
 moueatur ad omnem diametrum, & quod ha-  
 beat omnia illa, quæ dicuntur, est necessarium. Et  
 nihil est mirabile, aer suapte natura ferri fursū;  
 nihilominus quando aliquod operans vitur illo  
 tamquam instrumento, mouetur ad omnes loci  
 differentias. Proiciens vitur aere, vt instrumen-  
 to; si proicit sursum, mouetur sursum aer ad mo-  
 uendum proiectum; si deorsum, deorsum, & sic  
 ad ante, & retro, ad dextrum, & sinistrum. Res-  
 sensu euidens. Et potest haberi doctrina ex A-  
 ristotele

ristotele tertio de Cœlo. textu 28. Sic igitur est  
 de spiritu. Mouetur quodcumque, & quacumque  
 prout sibi paratæ sunt viæ, & instrumenta per  
 quæ a facultate animæ huc, & illuc transferatur.  
 Sic a corde, & ad cor, & sic secundum omnia, quæ  
 ab istis dicuntur. Non mouetur autem subito, ut  
 dicunt isti, sed mouetur prout requirit opportu-  
 nitas animæ mouentis ad viuificandum. Hic au-  
 tem licet videre, qui errores committantur ad pau-  
 ca respiciendo, & ignoratis communibus: Etiam  
 plantæ sunt animatæ, ubi motus talis huius spi-  
 ritus? & quomodo? In formicis, in Culicibus, in  
 alijs talibus quomodo? quid tale assignabitur?  
 Omnino non oportet communibus ignoratis  
 in suo genere velle differere de particularibus in  
 eodem, & prorsus fatuum est ita particularia di-  
 cere, ut communi penitus repugnent. Quod si  
 dicitur spiritus lucidus, est dictum methaphori-  
 cè contra spiritus melancholicos, qui habent plu-  
 rimum terrestris, quæ terrestitas facit crassitiẽ,  
 & opacitatem. Subiungunt alia, de quibus eo-  
 dem modo per discursum, vos postea facilè ap-  
 plicabitis singulis. Elementa, dicunt, agere ad  
 formas elementares, hunc spiritum agere ad for-  
 mam viui, nihil hoc mirum, quia agit motus ab  
 anima, quæ est principium vitæ; agit enim, ut il-  
 lius instrumentum. Dicunt, quod habent diuer-  
 sos



sos effectus, quòd non conuenit elementis.  
 Non est hoc dubium, quin debeat habere prout  
 dirigitur ab animà, tanto magis, quia pro va-  
 rijs operibus variè alteratur, & non est penitus  
 idem. Volunt ipsum agere sine contrario, quòd  
 est extreme fatuitatis. Nihil enim agit ad tras-  
 mutandum quouis modo materialiter, nisi ra-  
 tione contrarietatis. Quinimò etiam spiritus  
 alteratur, diminuitur, corrumpitur, quæ omnia  
 important contrarietatem in materia. Vnum  
 adiungunt, quòd est medicum, quòd iste spiri-  
 tus vehit virtutes animæ, vehit autem ipsas par-  
 tibus corporeis. Quare dicunt deberet esse sub-  
 stantiæ diuersæ, quia vehens est diuersum ab eo,  
 quòd vehitur, quòd dicitur ridicule. Primo non  
 vehit facultates; sed vi, quam habet, quia est pro-  
 ductus à calore temperamenti cordis, in quo pri-  
 mo est anima, traducitur ad partes ad viuifican-  
 das, ad fouendas, ad excitandas facultates, quæ  
 illis insunt, & quando non posset illuc traduci,  
 facultates oblanguescerent, quia etiam ipsæ sunt  
 adiuncte calori suorum temperamentorum, qui  
 calor destitutus, hac viuicatione, quâ supra dixi-  
 mus necessario lāgueret. Deinde dicunt, q̃ debet  
 esse quid distinctum. Est verum, sed non quòd  
 genere distinctum. Certè est distinctus spiritus  
 temperamento ab ossibus, & neruis, & est cor-

pus alterius conditionis in eodem tamen genere, quòd subiungunt contrahi ad cor, à corde dilatari, est verissimum, quia sequitur imperium animæ, cuius est instrumentum; quæ quidem anima pro vita, & pro operationibus oportunè ipsum administrat, semper enim hoc debetis habere, quòd nihil habet, nisi prout est animæ instrumentum. Similiter dicunt, quòd viget in angustiori, certum est, quia virtus vnita fit fortior, dilatatus minus viget, quia dispersio debilitat virtutem. Est etiam multi formis, vt dicunt, naturalis, vitalis, Animalis, sed hoc est propter variam sui alterationem, quam recipit, & per instrumenta ad id destinata, & tandem prout recipitur in ipsis partibus. Nimirum popolare est id, quod adiungitur de tractu spiritus in agone mortis. Cor vltimo moritur. Oportet autem esse respirationem vsque dum vita durat. Ille igitur motus est motus respirationis factus a virtute imbecilla, & ideo est cum illa inordinatione, & qui spiritus exit est aer educens fuligines quantum potest pro refrigerando corde, donec tandem (dicebat Aristoteles) facta omnimoda animæ absolutione, vltimum quid anhelitus apparet. Ex his, ni fallor, vos poteritis respondere de omnibus talibus, quæ vobis obijciantur.

*DICTIONVM OCTAVVM.*

*Adducuntur, & examinantur loci Aristotelis, quibus  
ille videtur ponere calorem cœlestem in natura  
receptum sublunari. Itemque Auer.  
& Io. Gram. dicta.*



**X**clusa fuit substantia cœlestis a mixtionibus elementorum prout in illis eam posuerunt vetustiores, de quibus Albertus: Quoniam autem nihil est prætermittendū, quod faciat ad rei cognitionem, postquam sunt varij Aristotelis loci, in quibus videtur ponere quendam calorem cœlestem in natura receptum, & qui poterit iudicari in nostris corporibus, calor innatus, de quo loquimur, ideo operæ pretium est adducere hos locos, & illos considerare, post quos etiam adducam alios grauiorum expositorum Auerrois, & Ioannis Grāmatici, qui loquitur ex communi quadam sententia suorum antecessorum, quibus omnibus habitis, deueniendum erit ad resolutionem. Et hac habita consideratione, deueniemus ad considerationem eorum quæ dicit Galenus, & erit finis huius tracta-

tionis. Vnus igitur locus est secundo de Generatione Animalis capite 3. in his verbis. *Sed omnis animæ siue virtus, siue potētia corpus aliud participare videtur, idque magis diuinum, quam ea quæ elementa appellantur. Et subiungit post pauca, Inest enim in semine omnium, quod facit, vt fecunda sint semina, videlicet quod calor vocatur. idque non ignis, non talis facultas aliqua, est sed spiritus, qui in semine, spumosoque corpore continetur, & natura, quæ in eo spiritu est proportionem respondens elemento stellarum. Et post pauca. At vero Solis calor, & Animalium non modo, qui semine continetur, verum etiam, si quid excrementi, sit tamen id, quod principium habet vitale. Et concludens, Ceterum calorem in Animalibus continetur, nec ignem esse, nec ab igne originem ducere apertum est ex his. Sunt alij loci eisdem in libris de Generatione Animalium, qui istud idem videntur attestari. Est 3. libro capite 11. talis sententia. Quoniam humor in terra spiritus in humore, calor Animalis in vniuerso est, ita vt quodammodo plena sint animæ omnia, & subdit. quamobrem consistit celeriter, cum calor ille comprehensus, siue exceptus est, comprehenditur autem, vt humoribus corporeis incallescantibus efficitur, velut bulla spumosa. Hæc omnia Aristoteles tribuit calori illi, quem dicit in vniuerso, & propter quod dicit omnia quodammodo plena esse animæ. Iterum est locus 4. de Generatione Animalium capite*

pite 10. quòd est ultimū, quo quidem loco vtun-  
 tur ad ponendas influentias secundum Aristote-  
 lem. Et nos totum illud caput considerabimus  
 in tractatu de Cœli, efficientia in mundum sub-  
 lunarem; nunc autem pro re quam agimus sunt  
 præsertim verba illa, quæ sic habent. *Luna autem  
 principium est propter Solis Societatem receptun-  
 que lucis. Fit autem quasi alter Sol minor, quam obrem condu-  
 cit ad omnes generationes perfectionesq; calores enim,  
 & refrigerationes cum moderatione quadam genera-  
 tiones sine moderatione corruptiones efficiunt.* Ad sunt  
 alij loci, & duo in Metheoris. primus est 2. libro  
 summa 2. capite 2. qui sic habet. *Sol autem & ces-  
 sare facit, & commouet flatus, debiles enim, & pau-  
 cas existentes exhalationes extinguit, & ampliori cali-  
 do illud, quòd in exhalatione minus existit disgregat.*  
 Alter locus est in eadē 2. summa 3. capite 2. sub  
 illis verbis. *Propter eandem causam, & circa eclips-  
 ses Lunæ aliquando accidit fieri terræmotum, quan-  
 do enim propè est interpositio, & nondum quidem est  
 omnino deficiens lumen, & calidum, quod à Sole.* In  
 his oībus locis videtur Phylosophus quodam-  
 calidum, vel quodam cœleste participare mun-  
 do sublunari, vnde poterūt habere aliquod fun-  
 damentum, qui calidum innatum reuocant ad  
 aliquid supra elementa cœlestis substantiæ. Est  
 modo Auerroes habitus præcipuus inter Philo-  
 sophi

sophi interpretes, qui aliquibus in locis huiusmodi aliquòd pronunciat. Vnus locus est 12. Methaph:com. 18. In eo còmento Auerroes multa disputat secundum varias sententias, deuenit ad Aristotelem, & cum ea proposuisset, quæ ad illam disputationem attinebant, habet hæc verba. *Et quia ista semina non faciunt hoc, nisi per calorem, qui est in eis, & calor ignis non facit nisi calefactionem, aut desiccationem, non figuram neque formam animatam, dicit Aristoteles in libro de Animalibus, quòd iste calor non est ignis, neque igneus; ignis enim corrumpit animalia, non generat, iste autem calor generat. Et post pauca subiungit. Vnde Aristoteles dicit, quòd homo generatur ex homine, et Sole, & factus est ille calor ex terra, & aqua ex calore Solis admisso cum calore aliarum stellarum, Et subiungit, calor igitur Solis, & stellarum diffusus in aqua, & terra generat animalia ex putrefactione nata, & vniuersaliter omnia, quæ fiunt ex non semine. Alter locus est in libro de substantia orbis capite secundo vbi cum exposuisset opinionem Aristotelis subiungit hæc verba. Et Expositores dant secundam causam, illuminationem scilicet, dicunt enim, quòd lux in eo, quòd videtur lux calefacere, quando reflectitur, & dicunt, quòd non est de accidentibus proprijs ignis sed de accidentibus communibus igni, & cælesti corpori, Et subiungit, & forte dicendum est ad hoc, quòd*

non

non est remotum, ut calor dicatur in eis equivoce per hoc signum, scilicet, quia calor ignis corrumpit, & destruit entia, calor verò corporum cœlestiū largitur vitam vegetabilem, sensibilem, & animalē, Et subdit. & secundum hoc calor erit duobus modis, calor, qui est de qualitatibus passivis, quæ transmutant substantiam in qua sunt; & calor, qui non est de qualitatibus passivis, Et post pauca addit; considerātes autem actionem stellarum in antiquo tēpore, verē dicunt quod quedam largiatur caliditatem, & siccitatem, quedam caliditatem, & humiditatem, quedam frigiditatem, & siccitatem, quedam etiam frigiditatem, & humiditatem, & sic quatuor qualitates communes corporibus cœlestibus, & quatuor elementis dicuntur equivoce, aut secundum prius, & posterius. Præter Auerroem est Ioannes Grammaticus, qui ut dicebā ex sua, & ex priorum sententia ita pronunciat. Est locus in primo Meteorū cāpite quarto super illis verbis: de caliditate autem facta, quam exhibet Sol præcipue in expositione illius partis. Videamus autem motum ipsum post multa habet hæc verba. Hæc igitur sunt, quæ hoc loco ab Aristotele disputantur: Ceterum nos quoque opere prætium est ea explicare, & pro patrocinio veritatis in medium proferre, quæ contra ipsius verba, singulasque sententias summo opere pugnare videntur. Cum postea versatus esset contra Aristotelem assignantem caliditatem

cor-

corporis Solis cogitans se illum vicisse. Habet hæc verba. *Et clam se ipso Aristoteles his assentitur, qui corpora cœlestia constare volunt ex quatuor rerum elementis, sydera tamen ex igni plurimo esse, Et paucis adiectis habet. Vel si hoc palam falsum est res, namque, quas ex propinquo habet calefacere Sol videtur, Et subiungit ipse, natura calidus, qualitate agat in res subiectus, vice ignis utique necesse est. Et cum ver satus esset circa Lunā scribit. Ex virtute luminis, & splendoris vim calefactoriam adipiscitur subiungendo, nisi enim pleno orbe, vel terris cōsiderit proxima, non calefacit. Lumē ergo suū tantummodo calefacit, nō motus, Et subiūgit, et quoniā lumē illius est tenue, & imbecillum, Et quæ sequuntur, quæ omnia ad idem tendunt, vt demonstraret calorem à cœlo prouenire, ex quo ista inferiora nanciscantur quandam perfectionem. Eo autem vsque rem deducit, vt aliter sentientes putet non philosophari, sed fabulari, & ponit hæc verba, nisi quidā fortasse fabulose, nos ad quasdam causas ignotas, occultasque rerum nouitates remittant, at relegent, cuiusmodi Damascius tamquam Auctorem Alexandrum facit, & subdit, neque postea hoc genus hominum pudet, qui eiusmodi fabulas comiscuntur negare rem tam apertam, de quibus etiam dicit. Hi autem homines in fabulas tantum conuerti in ignoratione rerum naturalium versantur, Et subdit namque illud profecto in*  
*ipsis*



*ipsis insigne vitium est, quia cum naturales quæstiones tractamus causas afferre naturales debemus.* Colligit tandem caloris proprii virtute Solem excalefacere hunc Mundum nostrum, & agere in res humanas. Hæc sunt quæ digna fuere, vt in hunc locum, & in hanc disputationem adducentur, quia cum sint grauissimæ sententiæ, & grauissimorum hominum poterant facile adducere volentes bene philosophari in aliquem errorem. Danda modo est opera, vt ea principia proponamus, ex quibus de his omnibus bene respondeamus, & ista principia applicemus ad declarationem singulorū locorum, qui id requirunt, quod tanto magis accurate est faciendum, quanto minus facile esse videtur.

### DICTATVM NONVM.

*Ponuntur fundamenta, & explicantur loci  
superius allati.*

**D**ifficultates contingentes in disputationibus nō bene resoluuntur, nisi re ipsa, in qua disputatur bene perspecta. Quocirca nos pro difficultatibus oībus enodandis debemus incumbere in rei explicatione, quanto breuius fieri potest, & facillime. Per vos enim ipsos

H

postea

postea faciētis applicationem ad omnes has pro-  
 positas. Incipiamus igitur ab hoc, quod certum  
 est, Aristotelem nolle vllum celestem calorem,  
 qui sit qualitas de celi substantia, esse in corpo-  
 ribus sublunaribus siue animatis, siue inanima-  
 tis. Hoc quidem primò potest parere ex his, quæ  
 dicit de ipso cælo, quod sit quintæ substantiæ  
 in libro de cælo, quod sit nec graue, nec leue.  
 Eodem enim modo ab ipso remouentur omnes  
 aliæ qualitates, in quibus sit contrarietas ad mo-  
 rum faciendum qualemcunque. Sed accipio  
 textum ipsum Phylosophi citatum principio  
 Metheor. capite quarto, vbi de calore loquens  
 inquit, quod proportionē responderet elemento  
 stellarum. Certum est, quod si responderet pro-  
 portione non est de illius natura, quia non es-  
 set proportio, sed esset conuenientia in substan-  
 tia, & natura. Et quod proportionatur ali-  
 cui, est diuersum ab illo, cui proportionatur,  
 nec potest dici esse de illius substantia. Ha-  
 bet autem calor ille seminalis proportionem  
 eum elemento stellarum; quia sicut elemen-  
 tum stellarum se habet ad omnia facienda, sic  
 iste calor se habet ad faciendum animatum in  
 tali genere, & habet vim effectiuam sub cælo or-  
 dinatam. Vnde est illud dictum. Sol, & homo  
 generant hominem; quatenus cælum, vt vniuer-  
 sale

sale efficiens subordinat sibi particularia effici-  
 cientia ad generandum in proprijs speciebus.  
 Est etiam textus primi Metheor. capite quarto,  
 ubi docet, quòd fit caliditas à Sole, & à cœlo  
 per motum, quòd non aliter fit, quàm excitando  
 calorem elementarem, prout motus dis-  
 gregat materiam per motum, prout etiam lu-  
 men facit ad rarefactionem, cum sit actus per-  
 spicui, quæ perspicuitas attinet ad raritatem,  
 ad quam postea rarefactionem sequitur excita-  
 tio calidi in existentis. Non est igitur dubium,  
 quin Aristoteles nolit, in aliquibus inferiori-  
 bus esse caliditatem aliquam, quæ sit de sub-  
 stantia corporum cœlestium. Sed præter hoc  
 ad sunt rationes, quæ id ostendunt. Accipia-  
 mus igitur quòd elementa sunt cœlo subordi-  
 nata, tamquàm instrumenta ad omnem gene-  
 rationem sublunarem, quia cœlum sine istis non  
 poterat hoc præstare; & generatio, & corru-  
 ptio acquirit actionem, & passionem, quæ non  
 est nisi per qualitates contrarias in eadem ma-  
 teria. Hæc verò est elementorum constitutio.  
 Dicite igitur hoc pacto. Vel natura paravit  
 instrumentum sufficiens ad opus faciendum,  
 vel non; si nō paravit, est contra primum prin-  
 cipium, quòd natura non deficit in necessarijs;  
 si paravit iam qualitates, quæ in his elementis

sunt repertæ, sufficiunt pro omni generatione, & omnino pro omni constitutione sublunariū. Si sufficiunt istæ; ergo frustra admiscetur hæc qualitas cęlestis, quæ sit de cęli substantia, & reperitur hic in seminibus, & in corporib. animalis. Vltèrius quęro utrū ista qualitas remaneat in misto, an non remaneat; si non remanet est frustra, quia sufficit substantia cęli effectiua per motū ad omnia efficienda modo prædicto, vt edo scilicet qualitatibus elementorum pro instrumento; si manet erit, vt materia, quæmadmodum etiam sunt aliæ qualitates elementorum. Et ita cęli substantia quouis modo erit materia sublunarium; contra verissimum dictum, quod primum efficiens non remanet pars facti. Dico primum efficiens, quia in naturalibus efficiens instrumentarium potest remanere materia eius, quod fit, vt faciunt elementa; quia vt dicebam sunt efficientia instrumentaria cęli, immò communiter dicitur, quod efficiens instrumentarium in naturalibus reducitur ad materiam. Est etiam rationabile quæsitum. Cęlum est ad omnium conseruationem, si habet aliquem calorem, quem immitat in Mundum, cur non etiam frigus, quia etiam frigida conseruanda. Viderunt difficultatem, vt adnotauit Ioannes Grammaticus, & dixerunt etiam esse stellas fridas,

das, & rem deduxerunt ad influentias, quod tamen (vt etiam dicebat Ioannes Grammaticus) est omnimodè ridiculum. Cælum enim est vbi-que eiusdem substantiæ. Quare non est locus varietati istarum qualitatum contrariarum. Videmus, quòd in Cælo sunt partes dēfiores propter materiæ multiplicationem, sunt partes rariores, quæ sunt Diaphanæ. Nihilominus in omnibus eadem substantia, variantur solum accidentia consequentia illam, prout aliæ partes sunt lucentes, vt Sol, & aliæ stelle; aliæ transparentes, vt ipsi orbes; quod possunt dicere (& videtur Auerroes proposuisse), has qualitates dici æquiucè hic, & in Cælo si æquiuocatio erit declaranda, certè illam non declarabunt. Addite, quòd non decet Philosophum dicere, sed oportet demonstrare, quod videant ipsi, an possint facere, siue ratione, siue sensu. Omnino autem est dictum Aristotelis ab omnibus acceptum, quia certissimū, Mundum inferiorem esse quodammodo continuum superioribus latioribus, vt omnis eius virtus inde gubernetur. Ratio gubernationis est ista, Cælum est prima substantia sensibilis, quia componitur ex materia, & forma alterius naturæ ab inferioribus, & domināte materiam, & formam inferiorem. Ratione igitur istius dominij quātum ad substantiam

etiam habet primitatem in natura. Et est certa propositio, quod primū in omni genere est causa alijs. Deinde cœlum mouetur, & mouetur motu circulari, qui est primus omnium motuum; quare etiam ratione primitatis motus habet locum primi, & locum causæ. Quare cœlum de sua substantia, & de ratione sui motus habet hoc imperium gubernandi, quia per ista excellit supra naturas sublunares. Dicite igitur hoc pacto, si cœlum ad gubernationē se habet per suam substantiam, & per suum motum, qui concurrit, & tamquam primus, & tamquam ille, qui adducit, & abducit luminosum, ex quo viuificatio inferiorum sufficit ad gubernationem prædictam. Non sunt cogitandæ alię qualitates, quæ sunt immanifestæ, nec possunt vlla via in illo demonstrari, sed primum est verum, quia si hoc non posset per suam primitatem, esset contra leges naturæ, quæ facit primum causa aliorum. Ergo nihil aliud est quærendum. Hæc est igitur rei explicatio. Videndū modo in locis Philosphi quid dicendum; de alijs enim pauca erunt dicenda. Aristoteles igitur semper dicit, quod iste calor est cœlestis, quod non est elementaris, quod non est igneus, nec ab igne originem ducit; & rectissime dicit, quia iste calor prout est subordinatus cœlo, habet cœlestes condiciones; agit enim  
sub

sub cœlo, & vi illius non vi propria elementari.  
 Dicite sic. Quod dicitur cœlestis in ratione operandi, & sic semper loquitur Philosophus, & dicitur non igneus, nec ab igne originem ducere, quia non habet eum effectiuam ad illud, quod debet facere, prout est igneus, aut ab igne habens originem, sed prout sub cœlo ita est ordinatus, ut cœlum per ipsum operetur aliqua, quæ calor elementaris, ut suæ naturæ dimissus, non posset operari. Neque enim calor elementaris, ut elementaris habet vim actiuam, sed solummodo, ut sub cœlo ordinatus. Ad hoc habetis pulcher-  
 rimam doctrinam Alexandri in quæstionibus naturalibus, de qua dicemus in tractatu de effici-  
 entia cœli. Quare nō dicitur hic calor cœlestis, quia fit productus à cœlo, vel quia fit qualitas illius substantialis, sed dicitur cœlestis quia ex-  
 stens in elemētis regulatur à cœlo, & fit propor-  
 tionatus ad agendum sub ipso omnia illa opera, quæ pro mundi conseruatione, & perfectione sunt necessaria. Hinc est illud, quod Aristoteles dicebat, animæ quodammodo esse omnia plena, quia ista caloris regulatio, & ista subordinatio eiusdem sibi ipsi fit à Cœlo per totum in quibus-  
 cumque partibus habeatur idonea materia pro tali opere. Vnde dicitur quodammodo plena, quia solum in virtute, & potentia talis caloris.

Hoc.

Hoc autem præcipue à vobis est intelligendum, quod Sol ita disponens, & regulans calorem disponit ipsum, & regulat quatenus simul habetur cum alijs qualitatibus elementaribus. Quare dicebat Aristoteles, refrigerationes moderatè factas esse per factivas. Fiunt autem sub Cælo istæ refrigerationes per ipsum cælum motu, & lumine, quatenus calor hoc, vel illo modo contemperatur. Habetis etiam hic, quomodo Luna plena dicatur esse alter Sol. Et dicebat Aristoteles, & est notum experimento, noctes plenilunij esse calidiores. Eodem modo fit hoc totum, quo fit etiam à Sole; Luna enim plena statim Sole occidente, succedit supra emisphærium. Unde disgregatio, quæ per motum à Sole fuit facta non potest cessare succedente alio disgregante, licet minus valido. Sic etiam excitatio caloris, quæ fuit facta per lumen Solis non potest cessare, quia succedit aliud lumen quod est etiam solare. Fiunt autem ista secundum magis, & minus, ut omnes potestis cognoscere. Quod vero ex his dicunt de influentijs suo tempore erit explicatû. Nunc istud solum accipite, quod illud, quod dicit adscriptû Ioannes Grammaticus Alexandro à Damasio nihil facit ad influëtias, quas Alexâder habet pro nugis, sed primus fuit Alexâder, qui quæsiuit, an virtutem Diuinam imprimat suo motu.



motu, & lumine Cœlum sublunaribus, per quã  
 elementa habent vim animasticam, & vim pro-  
 ducendi mirabilia. In qua speculatione nihil de  
 influentijs; sed mirabiliter se gerit secundum  
 principia, quæ superius posuimus. Et hoc totum  
 suo loco explicabitur. Quantum ad Auerroem,  
 ipse in illo comento 18. disputat contra multos  
 ponens opìniones, & obiectiones, et cōtra Chri-  
 stianos. Et pro sedanda disputatione, de hoc  
 quod dicitur, Cœlum operari secūdum has qua-  
 litates, inuenit illum modum, quod æqui uoce  
 dicantur hic, & ibi; alioquin Auerroes benè sen-  
 tit cum Aristotele secundum eum modum, qui  
 à nobis est propositus. Ioannes Grammaticus  
 fuit adductus, ne prætermitteremus dicta gra-  
 uiorum Expositorum. Sed Ioannes Grammaticus  
 eo loco est contra Aristotelem ex professo, quæ  
 vult cogi ex soliditate adducta, ponere in Cœlo  
 quatuor elementa, ut Plato. De qua re nunc non  
 est opportunum loqui, quia nimis extra propo-  
 situm existit. Habenda erit aliquando Apologia  
 pro Aristotele, & quantum ad hoc, & quantum  
 ad alia, in quibus Ioannes Grammaticus ei con-  
 tradicit.

DICTATVM DECIMVM.

*Proponitur opinio Galeni ex ijs, quæ dixit Lycon aduersus Hippocratem.*

**V**Enimus ad Galenum, qui varijs in locis meminit de calido innato, & de ipso discurret. Citat ipse librum de semine, & de temperamentis. Est præterea Aphor. 14. primæ sectionis, in quo digreditur circa calidum innatum. Sed quoniam eo loco se remittit ad librū, conscriptum aduersus Lycon, in quo exactè omnia proficitur se considerasse, ideo nos versabimur circa dicta in hoc libro, dantes operam, vt solum accipiamus ea, quæ sunt ad rem (nam prolixiores sūt ibi de alio disputationes, & ista, quæ sunt ad rem curabimus, vt dilucidè) & quantò breuius fieri potest, proponantur. Videbimus primò, quid dixerit Lycus, deinde quid contra Lycon Galenus, postea versabimur in resolutione. Lycus igitur exposuit Hippocratis Aphorismos, & in expositione illius Aphorismi. *Qui crescent habent plurimum calidi innati.* reprehendit Hippocratem, pro quo postea sumit Galenus defensionem; reprehensio verò est in illis verbis. *plurimum calidi innati.* & est talis. Haberi plurimū calidi.

calidi innati tripliciter potest cogitari . Vno modo pro ratione substantiæ . Alio modo pro intensiōe qualitatis . Tertio modo pro vigore, & robore agendi . Quomocunque accipiat, semper (inquit) Hippocrates est reprehēdendus, idque ostendit hoc pacto . Si vult dicere Hippocrates plurimū Pueris inesse calidi innati pro ratione substantiæ, dicit falsum: nam rei substantia, quæ in aliquo reperitur, sequitur molem, & magnitudinem illius . Vt si dicamus, animam extensam per corpus, erit maior in maiori corpore . Cum igitur in Adultis corpus sit maius, nō potest dici, calidum innatum pro ratione substantiæ esse plurimum in Pueris, cum Adulteriorū corpus sit longè maius . Sic faceret argumentum . Calidū pro ratione substantiæ suscipit esse multum, & paruum ex quātitate corporis, cui inest . Sed corpus Adulteriorum est longè maius, quā corpus Puerorum . Ergo plus calidi innati erit in Adultis, quos voco illos, qui iā creuerunt, & erit longè maius, quā sit in crescentibus, & Pueris . Non potest etiam, accipiendo calidum pro qualitatis intensiōe, dici maius in Pueris, quā in Adultis, quia nullum habemus signum, quo possimus istud dicere; quinimodò apparebunt signa contrarij, quia Adulti sunt vegetiores ad morū, qui prouenit à calido, & con-

coquunt etiam cibos duriores, quàm concoquant Pueri. Quare si philosophandum est ex manifestis, potius habendum cōtrarium, quàm id, quod dicit Hippocrates. Potest fortè (inquit Lycus) verificari dictum Hippocratis quantum ad vigorē, & ad robur agendi, quia scilicet pueris calidum innatum sit maximè potens quantum ad operationem, quia sit validior in ratione agendi, quàm in Adultis, quod videtur manifestum ex opere, quod exequitur; nam auget corpus, quæ est actio valdè difficilis, quam postea non habet calor in adultis. Sed tunc, inquit Lycus, èt Hippocrates est rēprehendendus, quia calor, qui illa opera debet facere, non debet esse plurimus, sed maximè temperatus, & absque excessu. Deinde abutitur vocabulo Hippo. quoniam non debet dici calor sic acceptus est plurimus, quod est vocabulum attinens ad quantitatem, sed debet dici validior, quo quidem vocabulo propriè significamus facultatem, & efficaciam agendi; ita vt Hippocrates secūdam primum modum potest benè vsus fuisse voce plurimi, notando extensionem substantiæ, quia multum, & paucum sic conueniunt, & consequenter plurimum; sed postea euidenter dicit falsum, quia demonstrat sensus esse totum oppositum, cum Adulti habeant maius corpus. In  
secun-

secunda significatione, quòd scilicet calidum accipiatur pro intensiōe qualitatis, abutitur voce plurimi, quia in quale non dicimus multum, & paruum siue plurimum, sed dicimus magis, vel minus intensiōem, & remissionem. Sed præterea falsum dicit, nam experientia docet oppositum, nempe in Adultis esse intensiorem caliditatem. In tertia significatione, vt dictum est, potest Hippocrates dixisse aliquid veri, sed tunc est evidens abusus illius vocis, quod non decet haberi in doctrina præsertim Aphoristica. Hæc Lycus. Galenus autem inuehitur contra illū more solito absque vlla modestia. Adoritur illum quasi vipera impetens morsu venenato. Vocat illum imprudentem, qui reprehendat doctrinam, quam ignorat, hippocraticā scilicet, & dicit, tales viros non esse ferēdos. Damnat etiam, quia eam attulit contradiotionem, quam nescit, quæ nullam sapit disciplinam, quæ euertit omnes artes. Et reprehendit, quòd Platonem non cognouit, hoc autem est in disputatione, quam habet Galenus contra Lycon super hac propositione, quod calidum, quā calidum non differt ab alio calido. Non hic sistit: reprehendit, quòd sibi pugnantia pronunciat, quòd corrumpit Iuuentutem, quòd nescit logicam, quòd est audacissimus, & nugacissimus,

simus, quòd deprauat dicta Hippocratis, & quādo illa damnat, & etiam quādo illa laudat. Quorum Galeni dictorum si aliquam partem, neque etiam minimam, reflectat Lycus contra Galenū, nihil p̄ecabit. Sed nos circa hoc non versamur. Puto clarè dicta, quæ Lycus dicit accepta ex ipso Galeno. Nunc videndum, quæ dicat Galenus aduersus Lycon. Sibi igitur proponit ostendendum, quòd secundum omnes tres illas significationes a Lyco propositas. Hyppocrates benè dixit, dicendo plurimum calidi innati inesse illis, qui crescunt, & reprehensionem Lyci proficisci ex illius ignorantia. Habet ipse has conclusiones. Prima est. Calidum innatum esse corpus quoddam, & substantiam corpoream compositam, quod si sciuiſſet Lycus, non ita reprehendisset. Subiungit secundam conclusionem. Istā corpoream substantiam constitui ex prima concretionē seminis, & sanguinis menstrui, quia oporteat huiusmodi calidum, in quo totū ipsius fœtus debet consistere, esse primò productū, & primò consistere. Quæri poterat, cur ista substantia sic concreta ex prima cōiunctione seminis, & sanguinis menstrui vocetur nomine calidi. Respondet, quòd illud corpus propositum dicitur calidum à qualitate, quæ est in illo maxime præcipua, & potestis addere maxime ad v-

sum

sum vitæ. Poterat aliquis vltcrius quærere, cur vocetur innatum. Respondet ad differentiam aliarum partium, quæ postea illi: adgenerantur est enim hoc corpus sine vlla distinctione organizationis, circa ipsum postea delineantur partes, ex quibus animal constituitur, & sic ei adnascuntur ossa, venæ, cartilagines, ligamenta, & alia, quæ postea in facto apparent: ita vt istud dicatur corpus innatum, quia (inquit Galenus) statim ab exordijs, hoc est ex eo tempore, quo primum ortum habuere ij, qui gignuntur præsto est. Et paucis interpositis, subdit, mox vero multa iugiter in ea intercedente alteratione ossis, quædam delineatio cartilaginis, ligamenti, nervi, & arteriæ, atque venæ, absolvitur. Sic Galenus ponit sibi principia, ex quibus Lyco contradicat. Ex istis autem nullum probat, sed simpliciter pronunciat, quæ tamen, vt videbitis in resolutione, indigebant multa probatione, quia si liceret dicere aduersus hominem grauissimū, & maximè famosum, talia dicta sunt similiora fictionibus, quàm rationibus demonstratiuis. Videbimus igitur, qualiter ipsis vtatur, & postea versabimur in illorum consideratione.

# DICTATVM VNDECIMVM.

*Examinantur, quæ dixit Galenus contra Lycon, & reprobatur eius sententia de corpore conglutinato ex semine, & menstruo.*

**N**tentio Galeni erat demonstrare Lyco, Hippocratem benè fuisse loquutū secundum omnes tres illos modos, quos Lycus proposuerat. Applicat igitur principia à se posita ad hoc demonstrandum, & inquit primò, calidum innatū benè dici ab Hippocrate plurimum secundum rationem substantiæ. Inquit, quod Lycus ignorauit, aliter in simplicibus, aliter in commistis dici aliquid magnum, & paruum, & plurimum. In simplicibus quidem dicitur secundum extensionem, quia talia sunt eiusdem naturæ. Sic dicemus in magno cubiculo esse plurimum aeris, in exiguo paruum; in commistis vero, id est in illis, in quibus est compositio multarum partium, ut est in Animalibus, vnum dicitur plurimum, non simpliciter, sed in comparatione, & proportionem ad alia: ut dicimus esse plurimum cerebri in Puerulo, & minimum cerebri in Elephante, cum tamen in isto cerebrum sit multo maius. Ratio est, quia dicimus  
pluri-



plurimum cerebri in proportione, & comparatione ad alias partes in Pueris, & ad alias partes in Elephantis. Stāte igitur isto principio rectē Hippocrates dicit, in Pueris esse plurimum calidi innati, illius scilicet corporeæ substantiæ, quam ponit Galenus in comparatione ad alias partes, quæ postea adueniunt huic corpori primigenio, quod quidem, inquit Galenus, nos videbimus esse verissimum, siquidem in Infante omnia sunt sanguinea, quemadmodum senes evadunt exangues, quos propterea dicimus habere parum calidi, istud enim calidum innatum semper decrescit crescētibus maximē alijs partibus in corporis augmento. Quare cum sic semper minuatur in senibus, remanet valdē pusillum respectu aliarum partium, sicuti in Infantibus, & crescentibus est valdē multum secundum eandem proportionē. Si igitur vellet Hippocrates, calidum innatum esse plurimum in crescentibus simpliciter ratione substantiæ aliquid dicēt Lycus, sed nō intellexit Hippocratē, quia vult calidum innatū dici plurimum in ratione substantiæ non simpliciter, sed in proportione prædicta. Et sic dictū Hippocratis verificatur secundum primum modum à Lyco propositum. Verificatur etiam in secundo modo, qui erat, ut intelligeretur plurimus calor in ratione qualitatis, quia propriæ qualitates non possunt separari a substantia. Quare cum sit plurimus secundum substantiam, etiam debet esse verum, quod est

plurimus secundum qualitatem, qua eadem ratione etiam verificatur in tertio modo, secundum facultatem scilicet, & vigorem actionis; etenim istud omne necessario consequitur ad duo alia ad plurimam substantiam, & consequenter plurimam qualitatem. Nec est Hippocrates abusus vocabulo plurimi; nam, ut monstrat Galenus quamvis prolixè, iste modus loquendi est vsitatus etiam in qualitatibus, & facultatibus actiuis, ut scilicet dicatur plurimæ, vel non plurimæ. Hæc igitur Galenus. Contra quem oportet dicere, non autem contra singula, sed contra ea, quæ sunt ad nostrum propositum, ne prolixitate rem inuoluamus, quam volumus esse dilucidam. Videndum autem est modestius, quàm ipse contra Lycon. Ut itaque etiam dicamus reuerenter, dicamus solum per modum quæsitæ, qui modus etiam faciet, ut facilior sit deffensio Galeni, si aliquis ex Medicis voluerit esse pro ipso. Quæro igitur primò, an velit Galenus, esse etiam calorem innatum in plantis, dubio procul debet velle, quia plantæ viuunt, & sine hoc calido non est vita, non solum ut dicit Phylsophus, sed ut dicit sensus ipse, & commune experimentum. Peto modo ab ipso, quomodo in illis sit hoc corpus conglutinatum ex semine, & menstruo, si ibi non est semen, neque menstruum; quodd si dixerit esse aliquid proportionale, primò debebat

bat hoc aduertere , deinde oportebat istud ostendere , vt facit Aristoteles de proportionale cordis . Ostenditur enim pars in planta , quæ primo nascitur , & vltimò moritur , & hoc est illud proportionale ; quòd si talis pars est illa , quæ primo nascitur , non erit ante ipsum corpus , quod dixit calidum innatum , primò nascens . Quæro secundo . Quomodo in animalibus generatis ex putredine ostendet mihi esse istud corpus concretum ex semine , & menstruo , cum neutrum ibi sit ? Et si aduertamus illorum generationem , numquam possumus cogitare in ea primò haberi aliud corpus , quod calidum innatum debeat vocari . Sed , vt dicebam in principio , necessarium est illum , qui vult versare circa particularia ignoratis communibus incidere in hos errores . Calor certè temperamenti est in omnibus istis , & habet omnes illas facultates , quas diximus in principio , & sunt præcisæ facultates calidi innati . Tertiò quæro . Istud corpus , quod est calidi innati in illis animalibus perfectis , vt in homine , & alijs in quibus est , quoniam in illis hæc est prima coniunctio , quam dicit Galenus , quæro vbi est ? Nam si est corpus , debet esse alicubi . Ostendat aliquis si potest , quia in Galeno non satis liquet . Cum enim constituisset hoc calidum , dicit illi ad generari membra , & statim inquit , esse hoc corpus plu-

rimum in Infantibus, quia omnia in illis sunt sanguinea, utrum velit hunc sanguinem ubique diffusum esse calidum innatum, non patet, nec rationabile est, ut dicatur, quia hoc non est corpus coniunctum ex sanguine menstruo, & semine, sed est sanguis ex nutritione nascens, ut etiam postea in Adultis. Peto igitur mihi ostendi, ubi sit hoc corpus, quod primò nascitur, & primò se habet ad totius constitutionem, cui omnia alia adnascantur? Quæro etiam, an sit necessarium calidum innatum esse diffusum per totum corpus, ita ut sit in vnoquoque minimo? Ego quidem pro certo habeo ita debere esse, quia in corpore animato quodlibet minimum vivit, & quodlibet minimum partium constituentium corpus, est animatum, quod penitus nequit esse sine calido innato. Peto igitur mihi ostendi, si hoc calidum innatum est corpus, quale dicit Galenus, quomodo diffunditur per omnes minimas partes, nisi concedamus corpus penetrare corpus? si solum diffunditur, & iuxta ponitur extrinsecè partibus, ipse partes secundum se non vivent, non possunt autem nutriri, nisi attrahant alimentum, quomodo attrahent, si non vivent si ut magnes ferrum attrahent extra se. Sed oportet, ut intra admittant, & ut nutriantur. Fibræ etiam ad attrahendum inerunt frustra, si ibi non adest anima, & calidum innatum, quod est illius instrumentum ad utendum illis fibris. Sed debet concoqui alimentum

tumeriam in partibus vltima coctione, per quam  
 fit assimilatio, quæ est assimilatio substantialis. Hoc  
 quomodo fiet, nisi in illarum substantia sit hoc ca-  
 lidum, cuius munere hæc omnia perficiuntur? Quæ-  
 ro insuper circa illam concretionem, quam ponit  
 Galenus feminis, & sanguinis menstrui, & debito  
 hoc pacto. Non est dubium, quod semen habet vim  
 actiuam, & sanguis menstruus habet vim passiuā,  
 vel, vt dicunt Medici, semen cōcurrit ad productio-  
 nem fœtus, & actiuè, & passiuè. Hoc nunc nihil ad  
 me. Non reuocatur in dubium, quin ibi sit, & acti-  
 uum, & passiuum. Quæro igitur, cur non agunt,  
 & patiuntur? Vbicumque enim sunt propinqua a-  
 ctiuum, & passiuum, & nihil impedit, necessarium  
 est sequi actionem. Fortè dicet aliquis, etiam in mi-  
 stis est calidum, frigidum, humidum, & siccum, &  
 tamen non agunt, & patiuntur inuicem. Aduertē-  
 dum est, quod ista sunt facta vnā, & conuenerūt  
 sub vna forma, quæ quidem forma continet illam  
 vnionem. Hic nihil tale dicit Galenus, nec etiam  
 potest cogitari, nam semen, & menstruum simul  
 coniunguntur non amittentia proprias naturas, vt  
 dicit Galenus, ad eò vt resultet quid tertium, vt re-  
 sultat ex elementis, sed permanēt in illa cōmixtio-  
 ne, veluti puto iuxtaposita. Cum igitur nihil im-  
 pediat, quin agant, & patiantur iuxta suas condi-  
 tiones, non video qua ratione in tali statu perma-  
 neant. Vnde etiam quæro, Istud corpus, quod voca-

tur calidum innatum, est ne sub aliqua forma, ita ut cōtineatur in tali esse? Quòd si est sub aliqua forma est ne viuum, & animatū? Si dicamus, quòd non est viuum, nec animatū, quomodo præcipua pars viuentis non est viua, nec animata? Si dicamus, quòd viuut, iam est contra medicos, quia nondum cor est factū, in quo est principiū vitæ, & sic habebitur vita sine principio vitæ. Sed præterea istud corpus nōdum est instrumentariū, ut dicit Galenus, qui dicit illi postea adnosci instrumenta: si non est instrumentariū, quomodo erit animatū, si anima est actus corporis naturalis instrumentarij? Quocirca habet Galenus sententiā plenam ambiguitatis, quas ego sic breuiter proposui. Si enim voluissem considerare singula dicta Galeni, potuissem quærere multo plura, sed ista pro re nostra sufficiant. Quòd si aliquis respondebit istis quæsitis, ut dicebat Plato, vicerit ille, & erit non tãquam inimicus, sed tamquam amicus. Nihil enim aliud quærimus, quàm (ut Aristoteles dicebat) veritatem, & naturam entium. Si afferantur responsiones, & declarationes ex rei natura, non parum fuerimus lucrati, qui scilicet didicerimus, & doctiores euaserimus.

# *DICTATVM DVODECIMVM.*

*Dilucidatur dictum Lyci. Et exponitur particu-  
 la Aphor. 14. prim. sect. Qui crescunt, &c.*

**D**icendum adhuc superest pro plena declara-  
 tione aliquid partim pro Lyco, partim pro  
 re ipsa. Pro Lyeo quidem animaduerten-  
 dum est, quòd non malè dixit, quando dixit, calo-  
 rem in Iuuenibus pro ratione substantiæ esse maio-  
 rem, quàm in Pueris, quia corporis moles sit maior.  
 Innititur enim hoc dictum principio proposito, quòd  
 calor innatus debet haberi in vnoquoque minimo  
 corporis. Est autem calor euidenter aliquod, quod  
 extenditur ad materiam, & est aliquid, quod ad ne-  
 ctit sibi quantitatem materiæ, in ratione suæ substan-  
 tiæ. Quare ex mole corporis necessariò recipit in-  
 crementum, quantum ad propriam substantiam, quia  
 omne materiale recipit incrementum suæ naturæ  
 ex materia, in qua est maiori, & minori. Non malè  
 etiam interpretatur Lycus Aphorismum, quòd Hip-  
 pocrates benè dixerit appellando plurimum calorem  
 ex vi operandi; hunc enim esse Hippocratis sensum  
 paulò post dicemus. Sed malè reprehendit Hippo-  
 cratem de abusu vocaboli, nollens dici de vi agendi  
 plurimum, vel nò plurimum, sed validum, & non va-  
 lidum. Cum enim hoc secundum recipiatur, non  
 tamen

ramen primum est inusitatū, sed, & apud Populū,  
 qui est arbitrer locutionis, & apud scriptores habetur  
 hic vsus, vnde de vi, & robore ad agēdum dicitur  
 plurimum, & non plurimū. Sic etiam apud Aristotelem  
 habebimus vim plurimam agendi, & non plurimā,  
 & dicimus communiter, plurimum posse. Quinimo etiam  
 in Aristotele habebimus vim agēdi finitam, & infinitam,  
 quæ omnia ad idem referuntur. Est autem Aristotelis doctrina,  
 quòd debemus vti vocabulis, prout sunt in vsu, & apud multitudinem.  
 Quare in hoc benè reprehendit Galenus Lycon. Et hæc quantum  
 ad ipsum. Quantum modo ad rem pro totius explicationis  
 dilucidatione puto ego non aliter fuisse loquutum Hippocratem  
 in illo Aphorismo, quàm respiciendo in calore innato  
 robur actionis, & vim ad agendum. Quod me mouet  
 est hoc. Dicit in eodem Aphorismo, qui crescūt plurimum  
 habere calidi innati, subiūgit, eos igitur plurimo egere  
 alimento; & reddit rationem, alioquin corpus absumitur.  
 Istud absumi corpus pertinet ad robur agendi in isto calore,  
 quia agit efficaciter, & non habens alimentum in quod  
 agat, agit in proprium suum subiectum, & illud consumit.  
 Vnde videmus ieiunantes macrescere, & consumi, quod  
 maxime euenit, vbi est multū calidi innati, quia ibi  
 multa actio ad humidi partium prefertim consumptionem.  
 Me mouet etiam, quòd sequitur, senibus inesse parum  
 calidi innati, & ideo indi-



indigere ipsos paucis fomitibus, quia à multis calor extinguitur. Ista extinctio nihil aliud est, quàm impedimentum actionis, vt magis repatiatur à nutrimento quam possit agere ad ipsum conuertendum. Ad idem facit id, quod sequitur, quòd non corripiantur febribus acutis; ratio est, quia calor non existens robustus ad agendum non potest mouere multam materiam, sed segniter se habet ad mouendum, vnde febres languidæ, & vt dicebat Auicenna sepultæ, in his generantur. Similiter puto ex Aphorismo antecedente idem haberi, quòd scilicet calor accipiatur ratione roboris ad agendum, quia inquit Hippocrates, Pueros difficulter ferre ieiunium, & inter ipsos maximè, qui sunt viuidiore; istud viuidius nihil aliud importat, quàm pròprietudinem, & vigorem ad agendum. Quare ego miror, cur recuratur in expositione huius Aphorismi ad sensus tam remotos, cum in ipsa littera omnia plana sint in sensu, quem posuit Lycus. Sed dicunt, Iuuenes habent efficacius calidum, quia concoquunt duriora alimenta, quia sunt in motibus vegetiores. Ratio deceptionis istorum est non benè rem intelligere. Quando dicitur in Pueris esse maiorem calorem, quantum ad vim agendi, hoc est maximè sensatum, si intelligatur, qualem actionem præstet hic calor; non solum enim debet concoquere, sed concoquere elixando, vt sit plenior distributio, ad faciendam auctionem. Debet facere illam distri-

distributionem, quæ requiritur ad fauendum ad glutinationem partibus pro nutritione, & auctione. Debet facere assimilationem, & tandem conuersionem in substantiam nutriti. Et hæc omnia conseruando figuram partium, & organizationem, & operando ad perfectionem instrumentorum, quibus corpus constat. Ad quæ omnia facienda non tanti est calor Iuuenum, in quibus nec fiunt elixationes tales, quæ deseruiant tot muneribus, nec est cura de perfectione instrumentorum; sed sufficit conseruatio, quæ quidem iam eriam propemodum ex principio benè posito est stabilita, & faciliè potest fieri, & conseruari. Sic igitur, si consideremus actiones caloris in his, qui crescunt, sunt multò maioris momenti, quàm in alijs, & requirunt calorem valdè efficacem ad agendum. Habet autem ex natura hanc efficaciam, quia in nuper natis, & in his, qui crescunt nondum agendo multum potuit repati, vt debilitaretur; deinde quia tunc est benè firmatum in proprio humido, quod quidem humidum deseruit ad omnes illas operationes, & est nondum aliquid repassum, vt de illius vi potuerit detrahi. Sic igitur ad sensum patet, vim agendi in tali calore esse robustissimam, & benè Hippocratem dixisse. Quòd modo dicunt de cibis durioribus, habet facilem responsionem; quia hoc pertinet ad instrumenta, quia requiritur masticatio, præsertim dicente Auicenna, quòd

cibus

cibus masticatione assumit quandam coctionem; in Pueris autem, & in Adolescentibus hoc non potest esse, quia non habent instrumenta, vel penitus instrumenta solida, & confirmata, prout ad hoc requiritur. Natura autem habet proportionem in rebus, & ideo pro qualitate nutriendi, & actionum agendarum parat nutrimentum. Sic videmus, Pullis nascituris in ovo paratum esse nutrimentum ex parte lutea ipsius oui. Idem etiam est considerandum de eo, quod dicitur, Iuvenes esse vegetiores ad motum; motus enim requirit instrumenta, quæ quidem nondum sunt perfecta, si adhuc crescit Animal, sed debent perfici, & non perficiuntur nisi per calorem, ut diximus in Pueris existentem. Ita ut sit multò maius opus perficere instrumenta ad usum, quàm postea uti illis perfectis. Si modo uellemus considerare, quomodo Galenus possit respondere de omnibus istis operibus, quæ debent fieri à calore innato posito illo suo corpore primigeneo, quod uocat calidum innatum, nos uideremus nullo modo conuenienter, & scientificè ipsum posse respondere. Dico conuenienter, & scientificè, quia non dubito, quin uerbosè, & nugaciter. Et ipse, si adesset, esset aliquid dicturus, & si quis uoluerit pro illo dicere. Quòd si nos accipiamus pro calido innato calidum temperamenti, & benè obseruemus non solum quæ à nobis dicta sunt, sed etiam

tiam quæ in natura contingunt, non dubitamus,  
quin benè omnia possint resolui, ita vt nihil relin-  
quatur in re vlla difficultatis. Quod facile consi-  
derantibus apparebit.

**F I N I S.**

**VENETIIS, MDCXXVI.**

---

Ex Thypographia Deuchiniana.

*Superiorum Permissu, & Privilegijs.*

Sumptibus Hieronymi Piuti.

*Ad Signum Montis Parnasi.*